

पावलसे कोरिन्थला विश्वासीगदेदा भिबा डाच्छारेमला चिठी

चु चिठीला बारेरी पाङ्तोःमा

भिबाम्हि: येशूला मुल चेला पावलसे भिबा मुबा। चु चिठी भिबाला लागिरी पावलदा सोस्थेनेस भिबा म्हिसे हो लबा मुबा (१ कोरिन्थी १:१)।

भिबा ग्ला: एशिया अञ्चलला एफिसस शहररी भिबा मुबा।

भिबा साल: ओस्पन ईश्वी संवत् ५५-५६ (विक्रम संवत् ११२-११३) सालरी भिबा मुबा।

खाल्दा भिबा: कोरिन्थ शहररी मुबा विश्वासीगदेदा भिबा मुबा।

पावलसे चु चिठी कोरिन्थला विश्वासीगदेदा डाच्छारेम भिबा मुबा। कोरिन्थ शहर चा ग्रीस भिबा यहुल्साला ग्लेखाड मुबा। पावलला धुइरी कोरिन्थसे अर्गु जम्मान यहुल्सादेन छ्यामएनोन ढिक्सी गे लबा मुबा। थे शहररी थरी थरीला ल्हानान रिमठिमदेन धर्मगदे तेन्बा म्हिगदे मुबा। थेहङ् लसीन नइबा गे लबा म्हिगदेएनोन मुबा। पावलसे थे शहररी थाबां पिन्बा समाचार थेःना लमा यहूदीगदेसे भन्दा अर्गु यहुलला ल्हानान म्हिगदेसे येशूदा विश्वास लजी। ओच्छे पावलसे थेरी मण्डली गिक स्होजी।

कोरिन्थला मण्डलीरी छेबा बङ्बा, नइबा बानीबेहोरदेन स्थान्दोदेन छ्याम ब्रेल्सी भ्रबा हङ्बा नइबा तामगदे मुबा। थेहङ् लसीन ब्याहला बारेरी, ज्ञान बुद्धिला बारेरी, मण्डलीला ठिमला बारेरीदेन परमेश्वरला आत्मासे पिन्बा मोलमला बारेरी ओच्छे सिबाग्याम सोबाला बारेरी ड्योइबा तामगदे मुबा। चु जम्मान तामगदेला बारेरी पावलदा ज्ञान बुद्धि

मुबासे लमा थेसे चु चिठीग्याम कोरिन्थला विश्वासीगदेदा ज्यना लसी घोना लजी।

परमेश्वरसे ह्वाडला म्हिगदेदा पिन्बा मोलमगदे न्हडरी माया चा जम्मान भन्दा ज्यबा हिन्ना भिसी १३ अध्यायरी भिबा मुला।

मुल तामगदे

- फ्याफुल्बादेन धन्यवाद पिन्बा १:१-६
- मण्डली न्हडरी आढिक्बा १:१०-४:२१
- नइबा गेगदे ख्लातो:बा ५:१-६:२०
- ब्याह लबाला बारेरी पाङ्बा ७:१-७:४०
- ख्रीष्टदा तेन्बागदेदेन मूर्तिदा तेन्बागदे ८:१-११:१
- मण्डली न्हडरी प्रभुदा तेन्बा धुइरी था ततो:बा ताम ११:२-१४:४०
- ख्रीष्टदेन ख्रीष्टदा विश्वास लबागदे सिबाग्याम सोबा १५:१-५८
- यरूशलेमरी मुबा परमेश्वरला म्हिगदेला लागिरी भेटी १६:१-४
- चिठीला थुमरी भिबा ताम १६:५-२४

पावलसे कोरिन्थला विश्वासीगदेदा भ्रिबा डाच्छारेमला चिठी

१ लास्सो, परमेश्वरसे म्हन्बा अन्छार ख्रीष्ट येशूला मुल चेला दोबारी धम्बा डा पावलदेन य्हाडला आले सोस्थेनेसग्याम † फ्याफुल्ला! २ चु चिठी डन्से कोरिन्थ शहररी मुबा परमेश्वरला मण्डलीला म्हिगदेदा भ्रिबान मुला। परमेश्वरसे एनीगदेदा ह्हाडलान म्हिगदे दोबारी ख्रीष्ट येशूग्याम चोखो स्होबा मुला। थेसे प्रभु येशू ख्रीष्टदा तेन्बा जम्मान ग्लारी मुबा म्हिगदेदा ह्हाडला म्हि स्होबा हड लसीन एनीगदेदा एनोन ह्हाडला म्हि स्होबारी ड्योडबा मुला। थेनीगदेदेन य्हाडला प्रभु गिक-नोन हिन्ना। * ३ य्हाडला परमेश्वर आबादेन प्रभु येशू ख्रीष्टसे एनीगदेदा दयामायादेन शान्ति पिन्गै।

पावलसे परमेश्वरदा धन्यवाद पिन्बा

४ एनीगदे ख्रीष्ट येशूदेन छ्याम गिक तसी परमेश्वरसे एनीगदेदा दयामाया लबासे लमा डाइ एनीगदेला लागिरी सदन डाला परमेश्वरदा धन्यवाद पिन्बा मुला। ५ एनीगदे ख्रीष्ट येशूदेन छ्याम गिक तबासे लमा एनीगदेदा परमेश्वरला बारेरी ज्यना लसी ताम पाङ्खम्बा शक्तिदेन जम्मान ताम घोखम्बा ज्ञान बुद्धि पिन्बा मुला। ६ तिगदा भिसम ख्रीष्टला बारेरी डन्से पाङ्मा सत्य हिन्ना भिसी एनीगदेदा पक्का मुला। ७ थेतबासेलमा य्हाडला प्रभु येशू ख्रीष्ट दोःसी फेप्खबा धुइ आततेधोना भ्रान्सी चिमा परमेश्वरदा तेन्बाला लागिरी एनीगदेदा तोःबा जम्मान मोलम याङ्बा मुला। ८ ओच्छे

१:१ सोस्थेनेस चा कोरिन्थ शहरला यहूदी नेता मुबा। थेसे पावलग्याम थाबा पिन्बा समाचार थेःसी प्रभु येशूदा विश्वास लबा मुबा।

१:२ मुल १८:१

यहाडला प्रभु येशू ख्रीष्ट दोःसी फेप्खमा एनीगदेदा तिगै दोष आरेबा म्हि स्होबाला लागिरी परमेश्वरसेन लिच्छाधोना एनीगदेला विश्वास कोड्ना लला। ६परमेश्वर विश्वास लखम्बा परमेश्वर हिन्ना। थेसे हाडला भा यहाडला प्रभु येशू ख्रीष्टदेन छ्याम ठिक्सी सेम गिक तबारी एनीगदेदा ड्योइबा मुला।

मण्डली न्हडरी आढिक्बा

१०ज्योज्यो आले नाना आडागदे, दाहेन्से डाइ एनीगदेदा यहाडला प्रभु येशू ख्रीष्टला अधिकारग्याम एनीगदे हाड हाड न्हडरी ठिक्सी चिउ भिबा डाला बिन्ती मुला। ओच्छे मण्डली न्हडरी तिगै आढिक्बा ताम खआपुङ्गो। बरु एनीगदेसे लबारी म्हाइबा तामगदेरी सेम गिक तसी चिउ। ११तिगदा भिसम डाला ज्योज्यो आले नाना आडागदे, एनीगदे हाड हाड न्हडरी कल लमुला भिबा ताम डादा क्लोए भिबा म्हेला म्हेमेगदे न्हडला खालैसे पाङ्जी। १२एनीगदेला बारेरी डाइ थेःबा ताम चा चुनोन हिन्ना, एनीगदे हाड हाड न्हडरी कोइसे “डा पावलला हिन्ना,” कोइसे “डा अपोल्लोसला हिन्ना,” कोइसे “डा पत्रुसला” हिन्ना” ओच्छे कोइसे

“डा ख्रीष्टला हिन्ना” भिसी पाङ्मुला रो।*

१३तिग ख्रीष्ट भो लबा मुला? तिग एनीगदेला लागिरी डा पावल कुसरी सिबा हिन्ना? ओच्छे डा पावलला मिनरी एनीगदेसे बप्तिस्मा किन्बा हिन्ना? आहिन। १४डाइ क्रिस्पसदेन गायसदा बाहेक स्थान्दो खालैदा बप्तिस्मा आपिन्नी, परमेश्वरदा धन्यवाद तगै।* १५थेतबासेलमा डाला मिनरी बप्तिस्मा किन्जी भिसी एनीगदे खालैसेन पाङ्आम्याङ्। १६हिन्बाम, डाइ स्तिफनासला दिमला जम्मान म्हिगदेदाएनोन बप्तिस्मा पिन्जी। चु बाहेक डाइ स्थान्दो खालैदा बप्तिस्मा पिन्जी कि आपिन्नी थे डाइ ढन्बा आरे।* १७तिगदा भिसम बप्तिस्मा पिन्बारी आहिन, तर थार्बा पिन्बा समाचार थेःना लबाला लागिरी ख्रीष्टसे डादा पुइबा हिन्ना। चु तामगदे डाइ हाडलान ज्ञान बुद्धिग्याम पाङ्बा आहिन। चुदे डाइ हाडलान ज्ञान बुद्धिग्याम पाङ्जी भिसम ख्रीष्ट कुसरी सिबा खेरो निला।

ख्रीष्टनोन परमेश्वरला ज्ञानदेन शक्ति हिन्ना

१८ख्रीष्ट कुसरी सिबाला बारेला समाचार नाश तबागदेसे मूर्ख ताम

१:१२ चु पदरी पत्रुसदा ल्हानान हड्बा बाइबलरी केफास भिसी भिबा मुला। पत्रुस भिबादेन केफास भिबा म्हि गिकनोन हिन्ना।

१:१२ मुल १८:२४ १:१४ मुल १८:८; १६:२६; रोमी १६:२३ १:१६ १ कोर १६:१५

हिन्ना भिसी म्हन्मुला। तर यहाड थाबा
याड्बागदेला लागिरी चा परमेश्वरला
शक्ति हिन्ना। १६ परमेश्वरला
बचनरीनोन चुहड् भिसी भिबा मुला,
“डाइ बुद्धि मुबागदेला बुद्धि नाश
लला

ओच्छे चलाकगदेला घोखम्बा
शक्ति म्हाना लला।”*

२० खड्, बुद्धि मुबा म्हिगदे खानड
मुला? खड्, यहूदी धर्मगुरुगदे खानड
मुला? ओच्छे ल्हानान ताम पाड्बा
चु धुइला म्हिगदे खड्? च्यागो,
परमेश्वरसे जम्बुलिङला ज्ञान
बुद्धिदा गे आखेल्ला स्होबा मुला।*
२१ जम्बुलिङला म्हिगदेसे हाडला
ज्ञान बुद्धिग्याम परमेश्वरदा डोआसे
भिबा ताम परमेश्वरसे हाडला ज्ञान
अन्छार म्हन्जी। बरु जम्बुलिङला
म्हिगदेसे गे आखेल्ला ताम हिन्ना
भिसी म्हन्बा डन्से थे:ना लबा थाबा
पिन्बा समाचाररी विश्वास लबा
म्हिगदेदा थाना लबा परमेश्वरदा
ज्यबा छोर्जी।

२२ च्यागो, यहूदीगदेसे चा उदेकला
चिनु उन्गो भिसी पाड्मुला।
ओच्छे अर्गु यहुलला म्हिगदेसे चा
जम्बुलिङला ज्ञान बुद्धि म्हाइमुला।
२३ तर डन्से कुसरी साइबा ख्रीष्टला

बारेरी पाड्मुला। चु ताम यहूदीगदेला
लागिरी चा छेर्ना लबा ताम दोजी,
ओच्छे अर्गु यहुलला म्हिगदेला लागिरी
चा गे आखेल्ला ताम दोजी।† २४ तर
यहूदी हिन्सै अर्गु यहुलला म्हि हिन्सै
परमेश्वरसे धम्बागदेला लागिरी चा
ख्रीष्टनोन परमेश्वरला शक्तिदेन ज्ञान
बुद्धि हिन्ना। २५ तिगदा भिसम म्हिगदेसे
परमेश्वरसे लबा ताम चा मूर्ख ताम
हिन्ना भिसी म्हन्सैनोन परमेश्वरला
ताम म्हिला ज्ञान बुद्धि भन्दा घेन मुला,
ओच्छे म्हिगदेसे परमेश्वर कमजोर
मुला भिसी म्हन्सैनोन परमेश्वर म्हिला
शक्ति भन्दा शक्तिशाली मुला।

२६ ज्योज्यो आले नाना आडागदे,
परमेश्वरसे धम्बा धुइरी एनीगदे
खाहड्बा मुबा? थे ताम ढन्गो।
म्हिगदेसे म्हन्बा अन्छार एनीगदे
न्हडला ल्हाना हड्बा म्हि ज्ञान बुद्धि
आरेबा मुबा। एनीगदे न्हडला ल्हानान
म्हि शक्तिशाली आरेबा मुबा, ओच्छे
यहुल्साला घेन म्हिला म्हेमेलाएनोन
आहिन मुबा। २७ तर डा ज्ञान बुद्धि
मुबा म्हि हिन्ना भिसी म्हन्बा म्हिगदेदा
पे:ना लबारी परमेश्वरसे जम्बुलिङला
म्हिगदेसे मूर्ख भिसी म्हन्बा म्हिगदेदा
धम्जी। ओच्छे डनी शक्ति मुबा म्हि
हिन्ना भिसी म्हन्बागदेदा पे:ना लबारी

१:२३ यहूदीला ठिम अन्छार कुसरी टाँगब लसी साइबा म्हि चा परमेश्वरग्याम सजाय
याड्बा म्हि हिन्ना भिसी म्हन्मुबा (प्रस्था २१:२२-२३ स्हीगो)। थेतबासेलमा कुसरी टाँगब
लसी साइबा येशू ख्रीष्टग्याम खाहड् लसी थाबा याड्ला भिसी यहूदीगदेसे म्हन्मुबा।
१:१६ यशै २६:१४ १:२० अय्यूब १२:१७; यशै १६:१२; ३३:१८; ४४:२५

कमजोर म्हिगदेदा धम्जी। ^{२८}ओच्छे चु जम्बुलिङला म्हिगदेसे घेन म्हन्बा म्हिगदेदा गे आखेल्ला स्होबाला लागिरी परमेश्वरसे म्हिगदेसेन हेला लसी गे आखेल्ला भिसी म्हन्बा म्हिगदेदा धम्जी। ^{२९}खालैसेन हाडला डाच्छापट्टि घमण्ड थालगै भिसीन परमेश्वरसे चुहङ् लबा हिन्ना। ^{३०}बरु परमेश्वरसेन एनीगदेदा ख्रीष्ट येशूदेन छ्याम गिक स्होबा मुला। परमेश्वरग्यामसेन ख्रीष्ट यहाडला ज्ञान बुद्धि दोबा मुला। थेहङ् लसी ख्रीष्टग्यामसेन यहाडदा परमेश्वरदा सेम निबा म्हि स्होजी ओच्छे यहाडला पापला सय फासी यहाडदा चोखो स्होसी फेबा मुला। ^{३१}थेतबासेलमा परमेश्वरला बचनरीनोन “चुदे खालै म्हिसे डा ज्यबा म्हि हिन्ना भिसी पाङ्बा सेम मुसम, थेसे प्रभुसे लबा गे गाते ज्यबा मुला भिसी पाङ्गै” भिसी भिबा मुला।*

परमेश्वरला आत्माग्याम याङ्बा ज्ञान बुद्धि

२ डाला ज्योज्यो आले नाना आडागदे, परमेश्वरला बारेरी पाङ्बारी डा एनीगदे मुबा ग्लारी खमा डाइ डाला ज्ञान बुद्धिरी घमण्ड लसी एनीगदेदेन छ्याम घेन घेन ताम आलनी। ^२तिगदा भिसम डा एनीगदेदेन छ्याम मुबा धुइरी येशू

ख्रीष्ट कुसरी सिबा ताम बाहेक अर्गु तिगै ताम एनीगदेदा आपाङ्बा पक्का लबा मुबा। ^३एनीगदे मुबा ग्लारी खमा धुइरी डा कमजोर मुबा, ओच्छे लोङ्सी डाला तिङ धर्बा मुबा।* ^४डाइ एनीगदेदेन छ्याम ताम लबान बचनग्याम पाङ्मा एनीगदेदा वहाम्बारी डाला ज्ञान बुद्धिदेन शक्तिग्याम तिगै ताम आपाङ्नी, तर डाला गेग्यामसेन परमेश्वरला आत्माला शक्ति उन्जी। ^५एनीगदेला विश्वास म्हिला ज्ञान बुद्धिथोरी आहिन, तर परमेश्वरला शक्तिथोरी तिगै भिसी डाइ थेहङ् लबा हिन्ना।

^६तसैनोन पाको म्हिगदेदा डन्से ज्ञान बुद्धिला ताम लोप्बा मुला। तर डन्से लोप्बा ज्ञान बुद्धिला ताम चु जम्बुलिङला म्हिगदेदेन शासन लबागदेला ज्ञान बुद्धिला ताम आहिन। थेहङ्बा ज्ञान बुद्धि थोबा म्हिगदे चा नाश तसी निला। ^७तर डन्से चा म्हिला ज्ञान बुद्धिग्याम घोबारी आखम्बा परमेश्वरला ज्ञान बुद्धिला बारेरी थेःना लबा मुला। चु ज्ञान बुद्धि चा जम्बुलिङ स्होबा भन्दा डाच्छान यहाडदा यहालदेन शक्ति पिन्बाला लागिरी परमेश्वरसे म्हन्बा अन्छार फेसी थान्बा मुबा। ^८चु जम्बुलिङरी शासन लबागदे खालैसेन चु ताम आघोनी। चुदे थेनीगदेसे घोबा हिन्सम यहालदेन शक्ति मुबा प्रभुदा कुसरी

टांगब आलसेला मुबा। ६तर बचनरी
चुहङ् भिसी भिबा मुला,

“खालैसेन खाइमै आम्राड्बा,

खाइमै आथे:बा,

खाइमै सेमरी आम्हन्बा तामगदे

परमेश्वरसे ह्वाङ्दा माया लबा

म्हिंगदेला लागिरी ठीक लबा

मुला।”*

१०परमेश्वरसे ह्वाङ्दला आत्माग्यामसेन
य्हाङ्दा थे जम्मान ताम उन्बा मुला।
तिग्दा भिसम परमेश्वरला आत्मादा
जम्मान ताम था मुला। ओच्छे म्हिसे
था आयाड्बा परमेश्वरला सेमला
तामगदेएनोन परमेश्वरला आत्मादान
था मुला। ११म्हिला सेमला ताम थे
न्हङ्गरी मुबा ह्वाङ्दलान आत्मासे जे
घोला, थेहङ् लसीन परमेश्वरला
सेमला ताम परमेश्वरला आत्मासे जे
घोला। १२य्हाङ्दसे जम्बुलिङ्गरी मुबा
आत्मा याड्बा आहिन, तर दाहेन्से
परमेश्वरसे पिन्बा जम्मान मोलमगदे
घोबारी खम्गौ भिसी परमेश्वरसेन
ह्वाङ्दला आत्मा य्हाङ्दला पिन्बा मुला।

१३ङन्से थे:ना लबा ताम म्हिला ज्ञान
बुद्धिग्याम लोप्बा तामगदे आहिन, तर
परमेश्वरला आत्मासे ङन्दा लोप्बा
तामगदे हिन्ना। थेनोन तामगदे ङन्से
परमेश्वरला आत्मा मुबागदेदा लोप्बा
मुला। १४तर जुन म्हिदेन परमेश्वरला
आत्मा आरे थेसे परमेश्वरला

आत्माला तामगदेरी विश्वास आल।
तिग्दा भिसम थेला लागिरी थे तामगदे
चा मूर्ख ताम हिन्ना। थे जम्मान
तामगदे परमेश्वरला आत्माग्यामसे
जे घोबारी खम्बा तामगदे तबासे लमा
थेसे घोबारी आखम। १५परमेश्वरला
आत्मा मुबा म्हिसे जम्मान स्हे ठीक
मुला कि आरे भिसी च्याबारी खम्ला।
तर परमेश्वरला आत्मा आरेबा
स्थान्दो खालै म्हिसे थेदा ठीक मुला
कि आरे भिसी च्याबारी आखम। १६तिग्दा भिसम बचनरी चुहङ् भिसी
भिबा मुला,

“खाल्से प्रभुला सेम घोखम्ला?

ओच्छे खाल्से प्रभुदा लोप्बारी

खम्ला?”

तर य्हाङ्दसे मी ख्रीष्टला सेम याड्बा
मुला।*

परमेश्वरला गे लबा म्हिगदे

३ डाला ज्योज्यो आले नाना
आडागदे, डा एनीगदेदेन छ्याम
मुबा धुङ्गरी डाइ परमेश्वरला आत्मासे
कुल्बा अन्छार भ्रबा म्हिगदेदेन छ्याम
हङ् लसी एनीगदेदेन छ्याम ताम
लबारी आखम्नी। तर डाइ एनीगदेदेन
छ्याम ह्वाङ्दला सेमसे म्हन्बा अन्छार
भ्रबा म्हिदेन छ्याम हङ् लसी ताम
लजी। ओच्छे डाइ एनीगदेदेन छ्याम
विश्वासरी† पाको आरेबा म्हिगदेदा

३:१ चु पदरी “विश्वासरी” भिबादा ग्रीक बाइबलरी ख्रीष्टरी भिसी भिबा मुला।

२:६ यशै ६४:४ २:१६ यशै ४०:१३

हङ् लसी ताम लबा मुला। ^२थे धुइरी एनीगदेसे कोड्बा चबा स्हे चबारी आखम्बासे लमा डाइ एनीगदेदा इहे जे ख्वाजी। दान्देधोनाएनोन एनीगदेसे चबा स्हे चबारी खम्बा आरे। * ^३अभ्र एनीगदे ह्वाडला सेमसे म्हन्बा अन्छार भ्रबा म्हिला हङ्बान बानीबेहोर थोसी भ्रबा मुला। ओच्छे एनीगदे ह्वाड ह्वाड न्हडरी गिकसेम गिकदा डाह लबान छेबा बङ्बा लमुला। थेतबासेलमा एनीगदे अभ्र ह्वाडला सेमसे म्हन्बा अन्छार भ्रबा स्थान्दो म्हि हङ्बान मुला। ^४तिगदा भिसम एनीगदे ह्वाड ह्वाड न्हडरीन कोइसे “डा पावलला हिन्ना,” कोइसे “डा अपोल्लोसला हिन्ना” भिमाहेन्से एनीगदे ह्वाडला सेमसे म्हन्बा अन्छार भ्रबा म्हिगदे हङ्बान आतनी? * तजी।

^५अपोल्लोसदेन पावल घेन हिन्ना? आहिन। डनी मी प्रभुसे कुल्बा अन्छार गे लबा म्हि जे हिन्ना। डन्से परमेश्वरथोरी विश्वास लबाला लागिरी एनीगदेदा हो लबा जे हिन्ना। ^६डाइ चा सूजी, ओच्छे अपोल्लोससे क्युइ युजी। तर थेदा परमेश्वरसेन लहेना लजी। * ^७थेतबासेलमा सूबादेन क्युइ युबा म्हि तिगै आहिन, तर लहेना लबा परमेश्वर चा घेन हिन्ना। ^८सूबादेन क्युइ युबा म्हि तिगै फरक आरे। थेन्नीसेन ह्वाड ह्वाडसे लबा गे अन्छारला ज्याला याङ्ला। ^९तिगदा

भिसम डनी न्ही चा परमेश्वरला गे लबा म्हि हिन्ना, एनीगदे चा परमेश्वरला बु हङ्बान हिन्ना।

ओच्छे एनीगदे परमेश्वरला दिम हङ्बाएनोन हिन्ना। ^{१०}परमेश्वरसे डादा पिन्बा दयामायाग्याम डाइ मुल कर्मीसे हङ् लसी जग थान्बा मुला। स्थान्दोगदेसे चा थे जगथोरी दिम स्होबान मुला, तर थे जगथोरी दिम स्होबागदेसे होशियार लसी स्होगै। ^{११}तिगदा भिसम थे जग चा येशू ख्रीष्टनोन हिन्ना। थे जग बाहेक स्थान्दो खालैसे अर्गु जग थान्बारी आखम। ^{१२}चुदे खालै म्हिसे थे जगथोरी म्हर, म्हुइदेन महँगो खाल्ला युड्बा, सिङ्, सो ओच्छे परालसे दिम स्होजी भिसम, ^{१३}थे जम्मान म्हिगदेसे लबा गे परमेश्वरसे निसाफ लबा धिनकुनु था याङ्ला। तिगदा भिसम निसाफ लबा धुइरी परमेश्वरसे मेरी युसी थेनीगदेसे लबा गे खाहङ्बा चीम भिसी च्याला। ^{१४}चुदे थे जगथोरी दिम स्होबा म्हिला गे मेरी युमा आक्रोनी भिसम थे म्हिसे इनाम याङ्ला। ^{१५}चुदे खालै म्हिला गे क्रोसी नाश तजी भिसम थेसे इनाम आयाङ्। तर थे म्हि चा मेग्याम स्योर्बा हङ् तसी जोगब तला।

^{१६}एनीगदेन परमेश्वरला मन्दिर हिन्ना, ओच्छे परमेश्वरला आत्मा एनीगदे न्हडरी धन्छ्यामुला भिबा ताम एनीगदेदा था आरे? ^{१७}चुदे खालै

म्हिसे परमेश्वरला मन्दिरदा नाश लजी भिसम परमेश्वरसेन थेदा नाश लला। तिग्दा भिसम परमेश्वरला मन्दिर चोखो मुला, ओच्छे थे मन्दिर चा एनीगदेन हिन्ना।

१८ खालैसेन हाडसे हाडदान धोका थापिन्गो। एनीगदे न्हडरी खालै म्हिसे हाडसे हाडदान डा चु जम्बुलिङला ज्ञान बुद्धि मुबा म्हि हिन्ना भिसी म्हन्जी भिसम थे तिगै था आरेबा मूर्ख म्हि हङ्बा दोतोःला। जमाहेन्से थे ज्ञान बुद्धि मुबा म्हि दोला। १९ तिग्दा भिसम परमेश्वरला लागिरी जम्बुलिङला ज्ञान बुद्धि चा मूर्ख ताम हङ्बान हिन्ना। बचनरीनोन चुहङ् लसी भिबा मुला,

“ज्ञान बुद्धि मुबा म्हिगदेसे लबा चलाक गेग्यामसेन परमेश्वरसे थेनीगदेदा चुङ्ला।”

२० दोःसी चुहङ् भिसीएनोन भिबा मुला,

“ज्ञान बुद्धि मुबा म्हिगदेसे म्हन्बा ताम गे आखेलबा ताम हिन्ना भिसी परमप्रभुदा था मुला।”

२१ थेतबासेलमा खालैसेन म्हिसे लबा गेरी घमण्ड थालगै। तिग्दा भिसम जम्मान स्हे एनीगदेलान हिन्ना, २२ पावलदेन अपोल्लोस ओच्छे पत्रुस, चु जम्बुलिङ, दान्देला धुइ, लिच्छाला धुइ, सिसै सोसै जम्मान एनीगदेलान हिन्ना। २३ ओच्छे एनीगदे चा ख्रीष्टला

हिन्ना, ओच्छे ख्रीष्ट चा परमेश्वरला हिन्ना।

ख्रीष्टला मुल चेलागदेसे नातोःबा ताम

४ म्हिगदेसे डन्दा ख्रीष्टला गे लबा म्हिदेन म्हिसे था आयाङ्बा परमेश्वरला सेमला ताम घोना लबा जिम्मा याङ्बा म्हि हिन्ना भिसी म्हन्तोःला। २ चुदे जे आहिन, चुहङ्बा गे लबा म्हि चा मालिकसे विश्वास लखम्बा म्हि ततोःला। ३ तर एनीगदेदेन म्हिगदेला निसाफ लबा अदालतसे डाला निसाफ लसैनोन थे ताम डाला लागिरी तिगै आहिन। ओच्छे डाइएनोन हाडसे हाडदान निसाफ आल। ४ डाइ तिगै आज्यबा गे लबा मुला भिसी डादा था आरे, तर चुहङ् भिदेमा डाला तिगै गल्ती आरे भिसी पाङ्बारी आखम। प्रभुसेन डाला निसाफ लला। ५ थेतबासेलमा प्रभुसे तोगब लबा धुइ भन्दा डाच्छान एनीगदेसे खालैदान निसाफ थालउ। बरु प्रभु फेप्खबा धुइ भ्रान्सी चिउ। धोपधोपरी लबा जम्मान ताम प्रभुसेन य्हालरी भसी म्हिंला सेमला जम्मान ताम उन्ना। थे धुइरी चा जम्मान म्हिसे परमेश्वरग्याम हाड हाडला गे अन्छार याङ्तोःबा इनाम याङ्ला।

६ दाहेन्से ज्योज्यो आले नाना आडागदे, चु तामग्यामसेन एनीगदेसे ज्यना लसी घोखमै भिसी डाइ डादेन अपोल्लोसला बारेरी पाङ्बा मुला।

परमेश्वरला बचनरी भ्रिबा भन्दा तिगै अर्गु ताम थालउ। ओच्छे एनीगदेसे कोइदा मान लबा, कोइदा मान आलबा थालउ। ^७खाल्से एनीगदेदा स्थहान्दो म्हिगदे भन्दा घेन स्होजी? तिग एनीगदेदेन छ्याम मुबा जम्मान स्हे परमेश्वरसेन पिन्बा आहिन? परमेश्वरसे पिन्बा स्हेगदेन एनीगदेदेन छ्याम मुला भिसम दोःसी तिगदा एनीगदे हाडसेन स्होबा हङ् लसी घमण्ड लबा?

^८हाडदा तोःबा जम्मान स्हे याङ्सी एनीगदे फ्युक्पो तसी जिन्बा मुला भिसी एनीगदेसे म्हन्बा मुला। ओच्छे डनी आरेसै ग्ले दोबारी खम्बा मुला भिसी एनीगदेसे म्हन्बा मुला। एनीगदेसे म्हन्बा अन्छार एनीगदे ग्लेनोन दोबा हिन्सम ज्यबा तसेला मुबा। तिगदा भिसम डन्सेनोन एनीगदेदेन छ्यामनोन शासन लबारी खम्सेला मुबा। ^९तर डनी मुल चेलागदेदा सिबाला सजाय याङ्बा म्हिगदेदा^१ हङ् लसी परमेश्वरसेन जम्मान भन्दा लिच्छापट्टि थान्बा मुला भिसी म्हन्बा मुला। थेहङ् लसीन डनी चा जम्बुलिङरी स्वर्गदूतगदेदेन म्हिगदेला ओन्छाङरी जम्मासेन प्राङ्गै भिसी उन्बारी थान्बा स्हे हङ्बान म्हन्बा मुला। ^{१०}डन्से स्त्रीष्टदा तेन्बासे लमा डनी मूर्ख म्हि हङ्बान हिन्ना, तर एनीगदेदा चा

स्त्रीष्टसे बुद्धि मुबा म्हि स्होबा मुला। डनी कमजोर म्हि हिन्ना, एनीगदे चा भङ्बा म्हि हिन्ना। ओच्छे डन्दा हेला लमुला, तर एनीगदेदा चा म्हिगदेसे मान लमुला। ^{११}दान्देएनोन डनी चबा थुङ्बा आयाङ्ना फोइथाननोन भ्रबा मुला, क्वान्बारी ज्यबा क्वान आरे। ओच्छे डन्दा म्हिगदेसे तोबा ग्याङ्बा लबा मुला, ओच्छे डन्ना दिमनामएनोन आरे। ^{१२}चबा थुङ्बादेन क्वान्बाला लागिरी डनी हाडसेन दुख लसी गे लमुला। स्थहान्दोसे बेइज्जत लमा डन्से थेन्दा मोलम पिन्मुला, ओच्छे दुख पिन्मा डन्से नामुला। ^{१३}डन्ना बेइज्जत लमाएनोन डन्से थेन्दा माया लसी ताम पाङ्बा मुला। दान्देधोनाएनोन म्हिगदेला लागिरी डनी जम्बुलिङरी तिगै गे आखेल्ला भ्याङ्तोःबा स्हेदेन फोहोर हङ्बान तबा मुला।

^{१४}चु ताम डाइ एनीगदेदा पेःना लबाला लागिरी भ्रिबा आहिन, तर एनीगदेदा डाइ माया लबा डालान कोलागदेदा हङ् लसी अर्ती पिन्बारी भ्रिबा हिन्ना। ^{१५}एनीगदेदा स्त्रीष्टला बारेरी लोप्बा म्हिगदे भ्याबारीन आखम्बाधोना मुसैनोन एनीगदेला आबा ल्हाना आरे, तर गिक जे मुला। तिगदा भिसम एनीगदेदा थार्बा पिन्बा समाचार थेःना लसी

४:६ थे धुङरी चा कोरिन्थीला ठिम अन्छार सजाय पिन्तोःबा म्हिदा जम्मान म्हिला डाच्छापट्टि भसी च्यानदा चपुङ्मुबा।

ख्रीष्ट येशूदा डोसेना लबासे लमा डा एनीगदेला आबा हड्बान दोबा मुला। ^{१६}थेतबासेलमा एनीगदे डा हड्बान दोगो भिबा डाला बिन्ती मुला। ^{१७}थेतबासेलमा डाइ माया लबा तिमोथीदा एनीगदे मुबा ग्लारी पुइखबान मुला। थे ख्रीष्टदेन छ्याम गिक तबादेन विश्वास लखम्बा डाला भा हड्बान हिन्ना। डाइ जम्मान गलाला मण्डलीगदेरी लोप्बा अन्छार येशू ख्रीष्टरी डा खाहड् लसी भ्रबा मुला भिबा ताम थेसेन एनीगदेदा ढन्ना लला।

^{१८}एनीगदे न्हडरी कोइ कोइ चा डा एनीगदे मुबा ग्लारी आख भिबा म्हन्सी घमण्ड लसी भ्रमुला रो, ^{१९}तर प्रभुसे सेम लजी भिसम डा योनान एनीगदे मुबा ग्लारी खला। ओच्छे थे घमण्ड लसी भ्रबा म्हिसे पाड्बासे लमा आहिन, तर थेनीगदेला शक्ति खाहड्बा चीम थे च्याला। ^{२०}तिगदा भिसम परमेश्वरला यहुल्सा ज्यबा तामग्याम जे आहिन, तर शक्तिग्याम[†] म्राड्मुला। ^{२१}डा थेरी धोखमाहेन्से डाइ एनीगदेदा तिग लगै भिसी म्हन्बा मुला? एनीगदेदा कडीसे सजाय पिन्गो कि सोजो तसी माया लउ?

ब्रेल्बा

५ डाइ एनीगदेला गुडरी स्थान्दोदेन छ्याम ब्रेल्सी भ्रमुला रो भिबा ताम थे:बान मुला। ओच्छे एनीगदे न्हडला गिकसे मी हाडलान आमच्याडदा[†] मिड स्होबा मुला भिबा ताम डाइ थे:बा मुला। चुहड् लसी मी अर्गु यहुलला म्हिगदेएनोन ब्रेल्सी आभ्रमुला। ^२तर एनीगदेसे मी घमण्ड लबा मुला। बरु एनीगदेसे मी दुख म्हन्तो:मुबा, ओच्छे थेहड्बा गे लबा म्हिदा एनीगदेला गुडग्याम ते:तो:मुबा। ^३डा ल्हुइरी एनीगदेदेन छ्याम आरेसै डाला सेम मी एनीगदेदेन छ्यामनोन मुला। ओच्छे डा एनीगदेदेन छ्याम मुबा हड् लसीन थेहड्बा गे लबा म्हिदा डाइ निसाफ लसी जिन्बा मुला। ^४एनीगदे यहाडला प्रभु येशूला मिनरी ग्ला गिकरीन हुप तमा, डाला सेमएनोन एनीगदेदेन छ्यामनोन तला, ओच्छे यहाडला प्रभु येशूला शक्तिएनोन थेरीन तला। ^५थे धुइरी थेला पाप लबा ल्हुइ[†] नाश तगै भिसी एनीगदेसे थेदा शैतानना यारी जिम्मा लसी पिन्गो। ओच्छे प्रभु दो:सी फेप्खसी निसाफ लबा धुइरी थेला आत्मा चा थाला।

४:२० “शक्तिग्याम” भिबा चा परमेश्वरला आत्मासे ख्रीष्टदा विश्वास लबागदेला बानीबेहोर परमेश्वरदा सेम निबा स्होबा हिन्ना। जमाहेन्से थे परमेश्वरसे म्हन्बा अन्छार भ्रबारी खम्ला।

५:१ “आमच्याड” भिबा चा आबासे भबा स्थान्दो मिड हिन्ना।

५:५ “पाप लबा ल्हुइ” भिबादा पापी बानीबेहोर भिसीएनोन धोखम्ला।

६ एनीगदेसे घमण्ड लबा ज्यबा आहिन। ज्योप्बा ब्रारी जजाकी खमीर युमाहेन्से^१ ज्योप्बा जम्मान ब्रादा भोना लमुला भिबा ताम एनीगदेदा था आरे? ७ खमीर आयुना ज्योप्बा छार ब्रा दोबारी एनीगदेसे डाच्छाला थे आज्यबा खमीर^१ तेःसी भ्याङ्गो। जमाहेन्से एनीगदे खमीर आयुना ज्योप्बा छार ब्रा हङ्बान दोला, तिग्दा भिसम ख्रीष्ट चा मिश्र यहुल्साग्याम फेसी खबा धिनदा ढन्सी धङ्बा चाडरी बलि फुल्बा ग्यु बोगो हङ्बान दोसी यहाङला लागिरी बलि तसी जिन्बा मुला। ८ थेतबासेलमा थे खमीर हङ्बा आज्यबा बानीबेहोर थोसी आहिन, तर सेमरी तिगै आज्यबा ताम आथान्ना सत्य ग्यामरी भ्रसी खमीर आयुबा गेड हङ्बान दोसी चाड धङ्गो।

९ डाइ डाच्छान एनीगदेदा ब्रेल्सी भ्रबा म्हिगदेदेन छ्याम संगतनोन थालउ भिसी अर्गु चिठीरी भ्रिबा मुबा। १० तर चु जम्बुलिङरी मुबा ख्रीष्टदा विश्वास आलना ब्रेल्सी भ्रबागदे, लोभ लबागदे, यहो लबागदेदेन मूर्तिदा तेन्बा म्हिगदेदेन छ्याम संगतनोन थालउ भिबारी म्हाइबा आहिन। थेहङ्ग भिसम एनीगदेसे चु जम्बुलिङनोन

रुलातोःला। ११ डाइ भ्रिबा ताम चा चुनोन हिन्ना। डा ख्रीष्टदा विश्वास लबा म्हि हिन्ना भिसी सुङसे चा पाङ्सी भ्रबा, तर गेसे चा स्थहान्दोदेन छ्याम ब्रेल्सी भ्रबा, लोभ लबा, मूर्तिदा तेन्बा, म्हिला तामगन लबा, ड्य्होइसी भ्रबादेन यहो लबा म्हिदेन छ्याम चा संगतनोन थालउ भिबा हिन्ना। थेहङ्ग म्हिदेन छ्याम मी चबा थुङ्बाएनोन थालउ। १२ ख्रीष्टदा विश्वास आलबा मण्डली^१ न्हङरी आरेबा म्हिगदेला निसाफ लबा गे डाला आहिन। तर ख्रीष्टदा विश्वास लबा मण्डली न्हङला म्हिगदेला निसाफ लबा गे एनीगदेला हिन्ना। १३ ख्रीष्टदा विश्वास आलबा मण्डली न्हङरी आरेबा म्हिगदेला निसाफ मी परमेश्वरसेन लला। परमेश्वरला बचनरी चुहङ्ग भिसी भ्रिबा मुला, “नइबा गे लबा म्हिदा एनीगदेला गुङग्याम तेःगो।”*

विश्वासी न्हङरी मुद्दा

६ एनीगदे न्हङरी खालैला स्थहान्दो विश्वासी गिकदेन छ्याम छेबा बङ्बा तजी भिसम तिग्दा निसाफ लसी पिन्गो भिसी परमेश्वरला म्हि मुबा

५:६ “ज्योप्बा ब्रारी जजाकी खमीर युमाहेन्से” भिबा चा जजाबा पापसे पूरान मण्डलीदा न्होङ्ना लमुला भिबा हिन्ना।

५:७ “आज्यबा खमीर” भिबा चा पाप लबा म्हि हिन्ना।

५:१२ “मण्डली” भिबा चा ख्रीष्टदा विश्वास लबा जम्मान म्हिगदे हिन्ना।

५:१३ व्यव १३:५; १७:७

ग्लारी आनिना परमेश्वरदान विश्वास
 आलबा म्हिगदे मुबा ग्लारी निबा?
 २परमेश्वरला म्हिगदेसे जम्बुलिङला
 म्हिगदेला निसाफ लला भिबा ताम
 एनीगदेदा था आरे? चुहङ लसी
 एनीगदेसेन जम्बुलिङला म्हिगदेला मी
 निसाफ लला भिसम तिग जजाबा ताम
 चा ढिक्ना लबारी आखम? ३य्हाङसे
 स्वर्गदूतगदेलाएनोन निसाफ लला
 भिबा ताम एनीगदेदा था आरे? थेहङ
 भिसम तिग चु धुङला तामगदे निसाफ
 लबारी गाहो मुला? ४चुहङ लसी छेबा
 बङ्बा तमा तिगदा एनीगदे मण्डलीसे
 मान आलबा स्थहान्दो म्हिगदे मुबा
 ग्लारी निसी निसाफ लसी पिन्गो
 भिसी पाङ्बा? ५एनीगदेदा मी पे:बा
 खतो:बा। तिग हाङला ज्योज्यो आले
 नाना आडा छेबा बङ्बा लमा निसाफ
 लखम्बा बुद्धि मुबा म्हि एनीगदे
 न्हङरी खालै आरे? ६तर एनीगदे मी
 विश्वासीगदे न्हङरी गिकसेम गिकला
 बिरोध लसी परमेश्वरदा विश्वास
 आलबा म्हिगदेला डाच्छा निसाफ
 लसी पिन्गो भिसी अदालतरी निमुला।

७एनीगदे हाङ हाङ न्हङरी गिकसेम
 गिकला बिरोध लसी मुद्दा लबासे
 लमा एनीगदे भ्रे:सी जिन्बा मुला। बरु
 मुद्दा आलना जस्तोन तसै एनीगदेसे
 नासी चितो:मुबा। ओच्छे ठगब लसै
 एनीगदेसे नासी चितो:मुबा। ८तर
 एनीगदेसे मी हाङलान विश्वासी
 ज्योज्यो आले नाना आडागदेदाएनोन
 दुख पिन्सी ठगब लबा मुला।

९आज्यबा गे लबा म्हिगदे
 परमेश्वरला य्हुल्सारी निम्याङ्बा
 हक आयाङ् भिबा ताम एनीगदेदा
 था आरे? एनीगदेसे हाङसे हाङदान
 धोका थापिन्गो। ब्रेल्सी भ्रबा म्हिगदे,
 मूर्तिदा तेन्बागदे, स्थहान्दोला मिङदेन
 छ्याम ब्रेल्सी भ्रबागदे, बेश्या मिङम्हेमे
 हङ्बा ब्रेल्सी भ्रबा हेम्कोलागदे ओच्छे
 मिङकोला मिङकोलादेन छ्याम
 हेम्कोला हेम्कोलादेन छ्यामनोन
 ब्रेल्सी भ्रबागदे, १०य्हो लबागदे, लोभ
 लबागदे, ड्य्होइसी भ्रबागदे, म्हिला
 तामगन लबागदेदेन स्थहान्दोला ब्यन्सी
 चबागदेसे परमेश्वरला य्हुल्सारी
 निम्याङ्बा हक आयाङ्। ११एनीगदे
 न्हङरी कोइ कोइ डाच्छा थेहङ्बान
 मुबा। तर दान्दे एनीगदेला पाप खुसी
 परमेश्वरसे चोखो म्हि स्होबा मुला।
 ओच्छे प्रभु येशू ख्रीष्टदेन य्हाङला
 परमेश्वरला आत्माग्याम एनीगदेदा
 हाङदा सेम निबा म्हि स्होबा मुला।

एनीगदेला ल्हुङ्ग्याम परमेश्वरदा मान लउ

१२एनीगदे न्हङरी खालैसे “डाइ
 जे लसै ठीक मुला” भिसी पाङ्मुला
 तला, तर जम्मान तामग्याम एनीगदेदा
 ज्यबा आत। डाइएनोन पाङ्खम्सेला
 मुबा, “डाइ जे लसै तला,” तर डा
 खजिबै तामला नोकर आदो।

१३एनीगदे न्हङरी खालैसे “चबा स्हे
 फोला लागिरी ओच्छे फो चबा स्हेला
 लागिरी हिन्ना” भिसी पाङ्मुला। थे

ताम ठीकनोन हिन्ना, तर परमेश्वरसे थे न्हीदान नाश लला। म्हिला ल्हुइ ब्रेल्सी भ्रबाला लागिरी आहिन, तर परमेश्वरदा तेन्बाला लागिरी हिन्ना, ओच्छे य्हाडला ल्हुइ चा प्रभुलान हिन्ना। १४ ओच्छे परमेश्वरसे हाडलान शक्तिग्याम प्रभुदा सोना लजी, य्हाडदाएनोन थेलान शक्तिग्याम थेसेन सोना लला।

१५ एनीगदेला ल्हुइ ख्रीष्टला या काड हड्बान हिन्ना भिबा ताम एनीगदेदा था आरे? थेहड् भिसम तिग डाइ ख्रीष्टला छ्यादेन स्थापदा भोर्सी बेश्यादेन छ्याम ब्रेल्बारी तला? आत, चु तनोन आखम्बा ताम हिन्ना! १६ बेश्यादेन छ्याम ब्रेल्बा म्हि चा बेश्यादेन छ्याम ल्हुइ गिक हड्बान तला भिबा ताम एनीगदेदा था आरे? तिगदा भिसम बचनरीनोन “थे न्ही ल्हुइ गिक हड्बान तला” भिसी भिबा मुला।* १७ तर जुन म्हि प्रभुदेन छ्याम गिक तला, थे म्हि प्रभुदेन छ्याम आत्माारीनोन गिक तला।

१८ थेतबासेलमा खाइमै ब्रेल्सी थाभ्रउ। तिगदा भिसम अर्गु पापसे भन्दा ब्रेल्सी भ्रबा पापसे चा म्हिला हाडलान ल्हुइदा ल्हानान न्होड्ना लमुला। १९ एनीगदेला ल्हुइ परमेश्वरला आत्माला मन्दिर हिन्ना। एनीगदेसे परमेश्वरग्याम याड्बा आत्मा एनीगदे

न्हडरी धन्छ्यामुला भिबा ताम एनीगदेदा था आरे? थेतबासेलमा एनीगदेला ल्हुइ एनीगदेलान आहिन, २० तिगदा भिसम परमेश्वरसे एनीगदेदा सय फासी ग्लुबा हिन्ना। थेतबासेलमा एनीगदेसे हाडला ल्हुइग्याम परमेश्वरदा मानदेन जयजयकार लउ।

ब्याह लबाला बारेरी पाड्बा

७ दाहेन्से एनीगदेसे भिबा तामगदेला बारेरी डाइ पाड्ला। म्हिसे ब्याह आलबान ज्यबा हिन्ना।† २ तर ल्हानान ब्रेल्सी भ्रबासे लमा जम्मान हेम्फेबेला हाड हाडलान मिड तगै, ओच्छे जम्मान मिडम्हेमेलाएनोन हाड हाडलान हेम्बो तगै। ३ हेम्बो हाडला मिडदेन छ्याम म्हेर्बा ख्लाबारी आत। ओच्छे मिडएनोन हाडला हेम्बोदेन छ्याम म्हेर्बा ख्लाबारी आत। ४ ओच्छे मिडसे हाडला ल्हुइथोरी हाडसेन अधिकार लआम्याड्, तर हेम्बोला अधिकार तला। थेहड् लसीन हेम्बोसेनोन हाडला ल्हुइथोरी हाडसेन अधिकार लआम्याड्, तर मिडसे अधिकार लला। ५ मिड हेम्बो खाइमै छ्यामनोन म्हेर्बा थाख्लागो। सल्लाह लसी तिगै धिनना लागिरी प्रार्थना लबाला लागिरी छ्यामनोन आम्हेसैनोन प्रार्थना लसी जिन्माहेन्से चा छ्यामनोन म्हेर्गो। आहिन्सम

७:१ ग्रीक बाइबलरी चा हेम्कोलासे मिडकोलादा आर्थुबान ज्यबा हिन्ना भिसी पाड्बा मुला।

६:१६ उत्प २:२४

एनीगदेसे सेम नाबारी आखम्बासे लमा शैतानसे एनीगदेदा फसब लला।

६ चुहङ् लसी लनोन तोःला भिसी डाइ एनीगदेदा कुल्बा आहिन। तर एनीगदेसे लबारी तला भिसी जे पाङ्बा हिन्ना।

७ हिन्बाम जम्मान म्हि डा हङ् लसी ब्याह आलना चिगै भिसी डाइ म्हन्बा मुला। तर जम्मान म्हिसे परमेश्वरग्याम थरी थरीला मोलम याङ्बा मुला, कोइसे ब्याह आलना चिबा मोलम याङ्बा मुला ओच्छे कोइसे ब्याह लसी चिबा मोलम याङ्बा मुला।

८ दाहेन्से ब्याह आलबा म्हिगदेदेन हेम्बो सिबा म्रिडम्हेमेगदेला लागिरी डाइ चु ताम पाङ्बान मुला, थेनीगदे चा डा हङ् लसीन ब्याह आलना चिबान थेनीगदेला लागिरी ज्यबा हिन्ना। ९ तर थेनीगदेसे हाडसे हाडदान तहरी थान्बारी आखम्नी भिसम ब्याह लगै। तिग्दा भिसम सेम नाबारी आखम्ना चिबा भन्दा बरु ब्याह लबा चा ज्यबा हिन्ना।

१० दाहेन्से डाइ ब्याह लबा म्हिगदेदा पाङ्ला, म्रिडसे हेम्बोदा थारुलागो। चु डाइ कुल्बा ताम आहिन, तर प्रभुसे कुल्बा ताम हिन्ना। ११ तर फेसी चिसैनोन स्थान्दोदेन छ्याम ब्याह थालउ। स्थान्दोदेन छ्याम ब्याह लबा भन्दा मी बरु दोःसी हाडला हेम्बोदेन छ्यामनोन ढिक्सी चिउ।

ओच्छे हेम्बोसेनोन हाडला म्रिडदा रुलाबारी आत।

१२ तर स्थान्दो जम्मादान[†] डाइ चुहङ् भिसी पाङ्ला, चु ताम प्रभुसे सुङ्बा ताम आहिन। तर डाइनोन पाङ्बा हिन्ना। चुदे प्रभुदा विश्वास लबा खालै ज्योज्यो आलेला म्रिडसे ख्रीष्टदा विश्वास लबा आरे, तसैनोन थेसे हाडला हेम्बोदेन छ्याम चिबा सेम लजी भिसम थे म्हिसे हाडला म्रिडदा थारुलागै। १३ चुहङ् लसीन खालै म्रिडम्हेमेला हेम्बोसे ख्रीष्टदा विश्वास आलसैनोन थेसे हाडला म्रिडदेन छ्याम चिबा सेम लजी भिसम थेसे हाडला हेम्बोदा थारुलागै।

१४ तिग्दा भिसम हेम्बोसे ख्रीष्टदा विश्वास आलसैनोन म्रिडसे विश्वास लबासे लमा हेम्बो परमेश्वरला म्हि दोखम्ला। ओच्छे म्रिडसे ख्रीष्टदा विश्वास आलसैनोन हेम्बोसे विश्वास लबासे लमा म्रिड परमेश्वरला म्हि दोखम्ला। थेहङ् आतबा हिन्सम थेनीगदेला कोलागदे चोखो आतसेला मुबा। तर थेहङ् तबासे लमा थेनीगदे मी परमेश्वरदा सेम निबा मुला।

१५ तर ख्रीष्टदा विश्वास आलबा म्हिसे चा रुलाबारी म्हाइसम रुलापुङ्गो। जमाहेन्से म्रिड मुसै हेम्बो मुसै थेनी गिकसेम गिकला तहरी चिआतोः। थेतबासेलमा थेन्नीदा

७:१२ “स्थान्दो जम्मादान” भिबा चा येशूदा विश्वास लबा भन्दा डाच्छान ब्याह लबा म्हिगदेदा पाङ्बा हिन्ना।

खालैसेन कर लसी ग्ला गिकरी थाथान्गो। थेन्नी चा फेसी चिबान ठीक मुला, तिग्दा भिसम परमेश्वरसे य्हाड्दा छेबा बड्बा लसी चिबारी आहिन, तर ढिकसी चिबाला लागिरी धम्बा हिन्ना। १६तिग ख्रीष्टदा विश्वास लबा म्रिडम्हेमेसे विश्वास आलबा ह्वाडला हेम्बोदा थाना लखम्ला भिबा ताम एनीगदेदा था आरे? ओच्छे ख्रीष्टदा विश्वास लबा हेम्फेबेसे विश्वास आलबा ह्वाडला म्रिडदा थाना लखम्ला भिबा ताम एनीगदेदा था आरे?

परमेश्वरसे म्हन्बा अन्छार भ्रउ

१७प्रभुसे एनीगदे जम्मादान खाहड् लसी भ्रगै भिसी म्हन्बा मुला थेनोन अन्छार भ्रउ। ओच्छे एनीगदेदा डाच्छा परमेश्वरसे धम्माहेन्से खाहड् लसी भ्रमुबा थेहड् लसीन भ्रउ। डाइ पाड्बा चु ताम जम्मान मण्डलीगदेला लागिरी हिन्ना। १८परमेश्वरसे धम्बा भन्दा डाच्छान खतना लसी जिन्बा मुसम थे म्हिसे दोःसी खतना आलबा म्हि दोबारी थाम्हाइगो। ओच्छे खतना आलमान परमेश्वरसे थेदा धम्जी भिसैनोन थेसे खतना थालउ। १९तिग्दा भिसम खतना लसै आलसै तिगै आहिन। तर परमेश्वरसे कुल्बा ताम इयान्बा चा घेन ताम हिन्ना। २०परमेश्वरसे थेनीगदेदा धम्बा धुइरी

थेनीगदे खाहड्बा मुबा थेनोन अन्छार लसी चिगै। २१परमेश्वरसे धम्बा धुइरी ए खालैला नोकराँ मुसैनोन एसे धन्दा सुर्दा थालउ। तर ए थेग्याम थोन्म्याड्सम थोन्गो। २२तिग्दा भिसम जुन म्हि प्रभुसे धम्बा धुइरी नोकर मुबा थेदा दान्दे प्रभुसे थेग्याम फेबा मुला। थेहड् लसीन प्रभुसे धम्बा धुइरी जुन म्हि खालैला नोकर दोबा आरेबा थे दान्दे ख्रीष्टला नोकर दोबा मुला। २३परमेश्वरसे एनीगदेदा सय फासी ग्लुबा हिन्ना। थेतबासेलमा एनीगदे म्हिला नोकर थादोगो। २४ज्योज्यो आले नाना आडागदे, परमेश्वरसे एनीगदेदा धम्बा धुइरी एनीगदे खाहड्बा मुबा थेनोन अन्छार सदन परमेश्वरदेन छ्याम चिउ।

ब्याहला बारेरी इयोइबा तामगदे

२५ब्याह आतबा म्हिगदेदा प्रभुसे कुल्बा ताम डादेन छ्याम तिगै आरे। तर प्रभुला दया याड्सी विश्वास लखम्बा म्हि तबासे लमा डाइ एनीगदेदा चु सल्लाह पिन्ना। २६चु धुइला दुखदा म्राड्माम एनीगदे खाहड् लसी चिबा मुला थेहड् लसीन चिबा ज्यबा तला भिसी डाइ म्हन्बा मुला। २७चुदे एसे ब्याह लसी जिन्बा मुसम ह्वाडला म्रिडदा रूलाबारी थाम्हाइगो। ओच्छे ब्याह लबा आरेसै ब्याह लबारी थाम्हाइगो। २८तर ब्याह लजी

७:२१ थे धुइला 'नोकरसे चा' गे लपुड्सीनोन तिगै आयाड्बा म्हि हिन्ना।

भिसै पाप आहिन। ब्याह आलबा म्रिडकोलासे ब्याह लजी भिदेमा थेसे पाप लबा आहिन। तर ब्याह लबा म्हिगदेसे चु जम्बुलिङरी ल्हानान दुख नातोःला डाइ मी एनीगदेदा चु दुखग्यामसे जे जोगब लबारी म्हाइबा हिन्ना।

२६ ज्योज्यो आले नाना आडागदे, डाइ पाङ्बारी म्हाइबा ताम चा चुनोन हिन्ना। दाहेन्से य्हाङला प्रभु फेप्खबा धुइ ल्हाना आरेबासे लमा म्रिड मुबागदेसे म्रिड आरेबागदे हङ् लसी चिउ। ३० क्राबागदे आक्राबा म्हिगदे हङ् लसी चिउ ओच्छे ताङ्बागदे आताङ्बा म्हिगदे हङ् लसी चिउ। ओच्छे तिगै ग्लुसी भबागदेसे हाङदेन छ्याम तिगै आरेबा हङ् लसी चिउ। ३१ थेहङ् लसीन जम्बुलिङला स्हे चलब लबा म्हिगदेसे थे स्हेगदेदा वास्तान आलबा हङ् लसी चिउ। तिगदा भिसम चु जम्बुलिङ म्हासी निबान मुला।

३२ एनीगदे जम्मान धन्दा सुर्दा आलना चिगै भिसी डाइ म्हन्बा मुला। ब्याह आलबा म्हिसे चा खाहङ् लसी प्रभुदा ताङ्ना लखम्ला भिसी सेमहेन्सेन प्रभुला लागिरी गे लमुला। ३३ तर ब्याह लबा म्हिसे चा खाहङ् लसी हाङला म्रिडदा ताङ्ना लखम्ला भिसी जम्बुलिङला तामगदेरी धन्दा सुर्दा लमुला। ३४ थेहङ्बा म्हिला सेम चा पट्टि न्ही तला। थेहङ् लसीन दोःसी ब्याह आलना चिबा म्रिडम्हेमेदेन

खाइमै ब्याह आलबा म्रिडकोलासे चा हाङला ल्हुइदेन आत्मा परमेश्वरलान हिन्ना भिबा तामरी जे धन्दा सुर्दा लमुला। तर ब्याह लबा म्रिडम्हेमेसे चा खाहङ् लसी हाङला हेम्बोदा ताङ्ना लखम्ला भिसी जम्बुलिङला तामरी धन्दा सुर्दा लमुला।

३५ डाइ चु ताम एनीगदेला लागिरी ज्यबा तगै भिसी पाङ्बा हिन्ना। एनीगदेसे चु लबारी तला, चु लबारी आत भिसी डाइ चु ताम एनीगदेला लागिरी ठिम स्होसी पिन्बा आहिन। तर एनीगदे प्रभुरी ज्यना लसी भ्रबारी खम्मै ओच्छे जस्तोन दुख तसैनोन प्रभुदा तेन्बारी खम्मै।

३६ चुदे खालै म्हिसे हाङला सेम तहरी थान्बारी आखम्ना हाङसे ब्याह लबारी ह्नीबा म्रिडकोलादेन छ्याम ब्रेल्बा सेम खजी भिसम थेदा ब्याह लपुङ्गो। चुहङ् लबा पाप आहिन। ३७ थेहङ् लसीन जुन म्हिसे ब्याह लबारी ह्नीसी जिन्बा म्रिडकोलादेन छ्याम खालैसे कर लसी आहिन, तर हाङलान सेमसे ब्याह आल भिसी हाङसे हाङदान तहरी थान्मुला भिसम थे म्हिसेनोन ज्यबान लबा हिन्ना। ३८ थेतबासेलमा जुन म्हिसे ब्याह लला, थेसे ज्यबान लबा हिन्ना। तर जुन म्हिसे ब्याह आल, थेसे भन ज्यबा लबा हिन्ना।

३९ हेम्बो सोतेधोना म्रिड हेम्बोलान तहरी तला। तर हेम्बो सिमाहेन्से थेदा ब्याह लइ म्हन्जी भिसम थेसे

स्थान्दोदेन छ्याम ब्याह लबारी खम्ला। थे म्हि चा प्रभुदा विश्वास लबा म्हि ततो:ला। ४०तर थे म्रिडम्हेमे ब्याह आलना चिजी भिसम थेला लागिरी भन ताड्तो:बा ताम हिन्ना। चु डाइ म्हन्बा ताम जे हिन्ना, तसैनोन परमेश्वरला आत्मा डादेन छ्याम मुला भिसी डाइ म्हन्बा मुला।

मूर्तिदा फुल्बा स्हेगदे

८ दाहेन्से मूर्तिगदेदा फुल्बा स्हेला बारेरी डाइ पाङ्ला। यहाड जम्मानदेन छ्याम ज्ञान बुद्धि मुला भिबा ताम यहाड जम्मादान था मुला। थे ज्ञान बुद्धिसे चा यहाडदा घमण्डी स्होला। तर मायासे चा मण्डलीदा भङ्ना लला। २चुदे खालै म्हिसे “डाइ जम्मान ताम सेबा मुला” भिसी म्हन्मुला भिसम थेसे जुन ताम सेतो:मुबा थे ताम चा सेबान आरे। ३तर जुन म्हिसे परमेश्वरदा माया लला परमेश्वरसे थेदा डोसेला।

४थेतबासेलमा मूर्तिगदेदा फुल्बा चबा स्हेला बारेरी च्यागे। जम्बुलिङरी मुबा मूर्ति तिगै आहिन। ओच्छे परमेश्वर बाहेक स्थान्दो खालै आरे भिबा ताम यहाडदा थानोन मुला। ५मुदेन जम्बुलिङरी मिन जेला ल लु मुला तला। चुहङ् लसी म्हिसे ल्हानान ल लुदेन प्रभुगदे तेन्सैनोन, ६यहाडला लागिरी चा परमेश्वर आबा गिक जे मुला, जम्मान स्हे थेसेन स्होबा हिन्ना। ओच्छे यहाड थेलान लागिरी सोबा हिन्ना। यहाडला लागिरी प्रभु गिक

जे मुला थे चा येशू ख्रीष्ट हिन्ना। थेग्यामसेन जम्मान स्हे स्होबा हिन्ना। ओच्छे थेग्यामसेन यहाड सोबा मुला।

७तर जम्मान म्हिदा चु ताम था आरे। ओच्छे एनीगदे न्हडला कोइ कोइ म्हिसे विश्वास लबा भन्दा डाच्छान मूर्तिदा पूजा लसी खबासे लमा दान्देधोनाएनोन थेहङ्बा चबा स्हे चमा चु चा मूर्तिदा फुल्बा स्हे हिन्ना भिसी म्हन्मुला। ओच्छे ज्यबा आज्यबा फेबारी खम्बा थेनीगदेला ज्ञान कमजोर तबासे लमा थेनीगदेसे “डाइ पाप लजी” भिसी म्हन्मुला। ८चबा स्हेसे यहाडदा परमेश्वरदा सेम निबा म्हि आस्हो। ओच्छे थेहङ्बा चबा स्हे चसैनोन यहाडदा न्होङ्ना आल, आचसैनोन यहाडदा ज्यबा तना आल।

९तर एनीगदे होशियार तउ, एनीगदेला लागिरी जम्मान स्हे चबारी तसैनोन विश्वासरी कमजोर मुबागदेसे पाप लआम्याङ्गै। १०चुदे कमजोर सेम मुबागदेसे एनीगदे सेबा घोबा म्हिगदेदा मूर्तिला मन्दिररी चबा थुङ्बा लसी चिबा म्राङ्जी भिसम, तिग थेनीगदेसे मूर्तिदा फुल्बा स्हेगदे चबा आँट आल? ११एला ज्ञान बुद्धि अन्छारला गे लबासे लमा थे विश्वासरी कमजोर मुबा ज्योज्यो आले नाना आडागदे नाश तला। तर ख्रीष्ट थेनीगदेला लागिरीनोन सिसी जिन्बा मुला। १२थेहङ् लसी एनीगदेसे विश्वासरी कमजोर मुबा स्थान्दो

विश्वासीगदेला सेम न्होङ्ना लबा चा
स्त्रीष्टला बिरोधरी पाप लबा हिन्ना।
१३ चुदे डाइ चबा चबा स्हेसे लमा
स्थान्दो विश्वासीगदे पापरी फसब
तला भिसम डाइ खाइमै स्या आच।
चुहङ् लसी स्थान्दो विश्वासीगदेदा
पापरी फसब लबा डाला सेम आहिन।

पावलएनोन अर्गु मुल चेलागदे हङ्बान हिन्ना

६ डा खजिबै स्हेला तहरी आरे। डा
मुल चेला हिन्ना। डाइ य्हाडला
प्रभु येशूदा म्राड्बा मुला। डाइ य्हाडला
प्रभुला लागिरी लबा गेग्यामसेन
एनीगदेसे थेंदा विश्वास लबा हिन्ना।
२ स्थान्दोगदेसे डादा मुल चेला आहिन
भिसैनोन एनीगदेसे मी डादा मुल चेला
हिन्ना भिसी म्हन्मुला। एनीगदेसे
प्रभुदा लबा विश्वासग्यामसेन डा मुल
चेला हिन्ना भिसी उन्मुला।

३ डाला अधिकारला बारेरी बिरोध
लसी ताम पाङ्बा म्हिगदेदा डाइ चुनोन
ताम पाङ्गला, ४ तिग एनीगदेग्यामसेन
चबा थुङ्बा किन्बा डन्ना हक आरे?
५ तिग स्थान्दो मुल चेलागदेदेन प्रभुला
आलेगदे ओच्छे पत्रुससे हङ् लसी
डन्सेनोन छ्याम छ्यामनोन प्रभुदा
विश्वास लबा मिड थोसी भ्रबा हक
आरे? ६ तिग बारनाबासदेन डाइ जे
सोबाला लागिरी ह्वाङ्सेन गे लतोःबा
हिन्ना?

७ तिग सिपाहीसे सरकारग्याम चबा
थुङ्बा आयाङ्? याङ्गला। तिग अङ्गुर

सूबा म्हिसे अङ्गुर आच? चला। तिग
म्हे मुङ् न्हबा म्हिसे ड्हे म्हुङ् आथुङ्?
थुङ्गला। ८ चु ताम डाइ म्हिसे म्हन्बा
ताम अन्छार जे पाङ्बा आहिन। तर
परमेश्वरसे मोशादा पिन्बा ठिमरीनोन
चुहङ् भिसी भ्रिबा मुला। ९ तिगदा
भिसम परमेश्वरसे मोशादा पिन्बा
ठिमरी “दाइँ लबा ग्लापला सुङ्गरी बोर
थाक्वान्गो” भिसी भ्रिबा मुला। तिग
परमेश्वरसे म्हेगदेला लागिरी वास्ता
लबा हिन्ना? १० तिग परमेश्वरसे
य्हाडला लागिरीन चु ताम सुङ्बा
आहिन? हिन्ना। य्हाडला लागिरी
चु ताम भ्रिबा हिन्ना। तिगदा भिसम
मोङ्बा म्हिदेन दाइँ लबा म्हिसे ह्वाङ्गला
भो याङ्गला भिबा आशसेन गे लमुला।
११ डन्से एनीगदेदा थार्बा पिन्बा
समाचार थेःना लबा चा ब्लु ह्वबा
हङ्बान हिन्ना भिसम एनीगदेग्याम
डन्से बाली दुङ्गला हङ् लसी तिगै
स्हे किन्मा उदेक म्हन्तोःला? १२ चुदे
स्थान्दो म्हिगदेसे एनीगदेग्याम तिगै
स्हे याङ्गला हक मुला भिसम भन
डन्ना मी घ्रेन हक मुला। तर डन्से थे
हक अन्छार आकिन्नी। बरु स्त्रीष्टला
थार्बा पिन्बा समाचार थेःना लमा
स्थान्दो म्हिदा विश्वास लबारी गाहो
थातगै भिसी जम्मान ताम नासी चिजी।
१३ तिग परमेश्वरला मन्दिररी गे लबा
म्हिसे मन्दिरग्यामसेन चबा स्हे चला
भिबादेन बलि फुल्बा ग्लारी गे लबा
म्हिसे बलि फुल्बा स्हेग्यामसेन भो
किन्ना भिबा ताम एनीगदेदा था आरे?

१४ चुहङ् लसीन थाबा पिन्बा समाचार पाङ्बा म्हिगदेसेनोन थे गेग्यामसेन चबा थुङ्बा लउ भिसी प्रभुसे कुल्बा मुला।

१५ तर डाइ याङ्तोःबा हक एनीगदेग्याम तिगै म्हाइबा आरे। दान्देनोन एनीगदेसे थे जम्मान ताम ढिकना लगै भिसीएनोन डाइ चु ताम भिबा आहिन। चुहङ् लसी डा ताङ्सी ताङ्सी थाबा पिन्बा समाचार थेःना लबा डाला गेदा खालै म्हिसे गे आखेल्ला स्होजी भिसम बरु डा सिबान ज्यबा तला। १६ डाइ थाबा पिन्बा समाचार थेःना लमा डाइ घमण्ड लतोःबा ताम आरे। तिगदा भिसम चु डाइ थेःना लतोःबान समाचार हिन्ना। चुदे डाइ थाबा पिन्बा समाचार थेःना आलनी भिसम डाला लागिरी चु भन्दा दुखला ताम अर्गु तिगै आरे। १७ तिगदा भिसम चु गे डाइ म्हन्बा अन्छार लजी भिसम डाइ इनाम याङ्ला। तर चु गे डाइ म्हन्बा अन्छार आल। परमेश्वरसेन डादा चु गे लउ भिसी जिम्मा पिन्बासे लमान चु गे लबा हिन्ना। १८ थेहङ् भिसम डाइ याङ्बा इनाम चा तिग हिन्ना? थे इनाम चा डाइ याङ्बा हक अन्छार तिगै स्हे आकिन्ना थाबा पिन्बा समाचार थेःना लबा चा डाइ याङ्बा इनाम हिन्ना।

१९ डा खालै म्हिला नोकर आहिन। तसैनोन ल्हानान म्हिगदेदा डाइ ख्रीष्ट मुबा ग्लारी भबारी खम्मै भिसी डा जम्मान म्हिला नोकर दोजी।

२० यहूदीगदेसे ख्रीष्टदा विश्वास लगै भिसी डा यहूदीगदे हङ्बान दोसी भ्रजी। ओच्छे परमेश्वरसे मोशादा पिन्बा ठिमला तहरी भ्रबा म्हिगदेसे ख्रीष्टदा विश्वास लगै भिसी डाएनोन थे ठिमला तहरी चिजी। २१ ओच्छे थे ठिम अन्छार आभ्रबा अर्गु यहूलला म्हिगदेसेनोन ख्रीष्टदा विश्वास लगै भिसी डाएनोन थेनीगदे हङ्बान दोसी भ्रजी। चु भिबा चा डाइ परमेश्वरला ठिमदा ख्लाजी भिसी पाङ्बा आहिन, तर डा ख्रीष्टला ठिम अन्छार भ्रबा मुला। २२ ओच्छे विश्वासरी पाको आरेबा म्हिगदे विश्वासरी पाको तगै भिसी डाएनोन थेनीगदे हङ्बान तसी भ्रजी। चुहङ् लसी जम्मान म्हिसे ख्रीष्टग्याम थाबा याङ्गै भिसी जम्मान म्हिगदेला लागिरी डा जम्मान थरीला म्हि दोसी भ्रजी। २३ चु थाबा पिन्बा समाचारग्याम मोलम याङ्ला भिबा आश लसीन डाइ थाबा पिन्बा समाचारला लागिरी चु जम्मान गे लबा हिन्ना।

२४ इनाम याङ्ला भिसी छ्योङ्बा म्हिगदे न्हङरी गिकसे जे इनाम याङ्ला भिबा ताम एनीगदेदा था आरे? थेतबासेलमा एनीगदेएनोन इनाम याङ्बालान लागिरी छ्योङ्गो। २५ तिगै खेलरी भो किन्बा म्हिसे जम्मान थरीला तालिम किन्तोःला। थेनीगदेसे म्हासी निबा इनाम याङ्बाला लागिरी थेहङ् लमुला। तर यहाङसे चा खाइमै आम्हाबा इनाम याङ्बाला लागिरी

थेहङ् लबा मुला। ^{२६}थेतबासेलमा डा
हाङ धोतोःबा ग्लारी आधोतेधोना
छ्योङ्बारी आरुला। थेहङ् लसी
म्हाडदुडरी छेक्वा म्हिसे हङ् लसी[†]
डाइ आछेक। ^{२७}तर डाइ डाला
ल्हुइदा दुख पिन्सी तहरी थान्ना।
थेहङ् आलनी भिसम स्थान्दो म्हिदा
थार्बा पिन्बा समाचार थेःना लना
लनान डाइ याङ्तोःबा इनाम आयाङ्।

इसाएलीगदेसे हङ् लसी मूर्तिदा थातेन्गो

१० ज्योज्यो आले नाना
आडागदे, एनीगदेसे चु
ताम था याङ्गै भिसी डाइ म्हन्बा
मुला। यहाडला आखे म्हेमेगदेदा मिश्र
यहुल्साग्याम खसुसे ग्याम उन्सी भोजी।
ओच्छे थेनीगदे जम्मान ज्यना लसी
समुन्द्र गुङग्याम निखम्जी। ^२ओच्छे
थेनीगदे जम्मान मोशाला लिच्छा भ्रसी
खसुदेन समुन्द्ररी बप्तिस्मा याङ्जी।
^३थेनीगदे जम्मासेन परमेश्वरला
आत्मासे पिन्बा चबा स्हे चजी।*
^४ओच्छे थेनीगदेदेन छ्याम छ्यामनोन
मुबा पहराग्याम परमेश्वरला आत्मासे
पिन्बा क्युङ् थेनीगदे जम्मासेन थुङ्जी।
थे पहरा स्त्रीष्टनोन मुबा।* ^५तसैनोन

थेनीगदे न्हङला ल्हानान हङ्बा
म्हिगदेदेन छ्याम परमेश्वर आताङ्नी।
ओच्छे थेनीगदे थे तोडतोडबा ग्लारीन
सिजी।*

^६थेनीगदेसे हङ्नोन यहाडसेनोन
आज्यबा सेम थाथोगै भिसीन
यहाडदा घोना लबाला लागिरी चु
ताम तबा हिन्ना। ^७थेनीगदे न्हङला
कोइ कोइसे मूर्तिदा तेन्बा हङ् लसी
एनीगदेसे थातेन्गो। थेनीगदेला बारेरी
बचनरीनोन चुहङ् भिसी भ्रिबा मुला,
“म्हिगदेसे चबा थुङ्बा लबारी चिजी
ओच्छे रेःसी मोजमजा लजी।”*
^८थेनीगदे न्हङला कोइ कोइ म्हिगदे
ब्रेल्सी भ्रबा हङ् लसी यहाड ब्रेल्सी
भ्रबारी आत। थेनीगदेसे थेहङ्बा
आज्यबा गे लबासे लमान तिरेरीन
बोगल गिकसे हजार सोम म्हि सिजी।*
^९थेनीगदे न्हङला कोइ कोइ म्हिगदेसे
प्रभुला[†] सेम च्याबा हङ् लसी यहाडसे
थेला सेम च्याबारी आत। प्रभुला सेम
च्याबासे लमा थेनीगदे पुख्रीसे जीसी
सिजी।* ^{१०}थेनीगदे न्हङला कोइ
कोइसे गनगन लबा हङ् लसी यहाडसे
गनगन लबारी आत। गनगन लबासे
लमा थेनीगदेदा नाश लबा दूतसे नाश
लजी।*

६:२६ चु चा बक्सीड क्लाङ्बा खेल हङ्बान म्हन्सी म्हाडदुडरीन म्हिदा आछेक भिसी घोना
लबा हिन्ना। तिग्दा भिसम कोरिन्थरी दिङ्गदङ्गसेन खेल क्लाङ्मुबा।

१०:६ चु पदरी प्रभुला साटोरी स्त्रीष्ट भिसी कोइ कोइ बाइबलरी भ्रिबा मुला।

१०:३ प्रस्था १६:३५ १०:४ प्रस्था १७:६; गन्ती २०:११ १०:५ गन्ती १४:२६-३०

१०:७ प्रस्था ३२:६ १०:८ गन्ती २५:१-१८ १०:९ गन्ती २१:५-६

१०:१० गन्ती १६:४१-४६

११ थे तामगदे य्हाङ्गदा घोना लबाला
लागिरी थेनीगदेदा तबा मुबा। थे
तामगदे जिन्बारी छ्याइबा धुइरी
य्हाङ्गदा होशियार तना लबाला लागिरी
भ्रिबा हिन्ना।

१२ थेतबासेलमा जुन म्हिसे डा ठीक
मुला भिसी म्हन्ना, थे म्हि चा होशियार
तसी चिगै। आहिन्सम थे म्हि हिल्ला।
१३ एनीगदेदा लोभ उन्सी फसब लमा
स्य्हान्दो म्हिगदेदा लोभरी फसब लबा
हङ्गबान तला। तर परमेश्वर विश्वास
लखम्बा परमेश्वर हिन्ना, तिगदा
भिसम परमेश्वरसे एनीगदेला सेमसेन
नाआखम्बाधोनाला लोभ उन्सी फसब
लबारी आपिन। एनीगदेदा फसब
लबारी लोभ उन्मा थेग्याम फेबारी
परमेश्वरसेन एनीगदेदा ग्याम उन्सी
पिन्ना।

१४ थेतबासेलमा डाला सेम निबा
होगदे, एनीगदेसे मूर्ति थातेन्गो। १५ सेबा
घोबा म्हि म्हन्सी डाइ एनीगदेदा
पाङ्गबान मुला। डाइ पाङ्गबा चु ताम
सत्य हिन्ना कि आहिन, एनीगदेसेन
पक्का लउ। १६ प्रभु भोजला खोरे
थोसी य्हाङ्गसे परमेश्वरदा धन्यवाद
पिन्सी थुङ्मा य्हाङ्ग ख्रीष्टला कारी
गिक तबा हिन्ना। ओच्छे गेङ क्युइसी
चमा य्हाङ्ग ख्रीष्टला ल्हुइरी गिक

तबा हिन्ना।* १७ गेङ गिकनोन हिन्ना,
थेतबासेलमा य्हाङ्ग ल्हानान मुसैनोन
ल्हुइ चा गिकनोन हिन्ना। तिगदा भिसम
य्हाङ्ग जम्मासेन गेङ गिकग्यामसेन
चबा मुला।

१८ इस्राएलीगदेदा च्यागो, परमेश्वर-
दा फुल्बा स्हे चबागदे परमेश्वरदा
बलि फुल्बा ग्लादेन छ्याम गिक तबा
मुला।* १९ डाइ पाङ्गबारी म्हाइबा तिग
हिन्ना भिसम, मूर्तिदा फुल्बा स्हे तिगै
आहिन, ओच्छे मूर्ति एनोन तिगैनोन
आहिन। २० तर मूर्तिदा बलि फुल्बा
अर्गु य्हुलला म्हिगदेसे परमेश्वरदा
फुल्बा आहिन, म्हाङ्ग म्हुङ्गदा हिन्ना।
थेतबासेलमा एनीगदे म्हाङ्ग म्हुङ्गदेन
गिक थातगै भिबा डाला सेम मुला।*
२१ एनीगदेसे प्रभुदेन म्हाङ्ग म्हुङ्ग
न्हीलान खोरेग्याम थुङ्गबारी आखम।
ओच्छे प्रभुदेन म्हाङ्ग म्हुङ्ग न्हीलान
टेबुलरी चिसीनोन चबारी आखम।†
२२ थेहङ्ग लजी भिसम प्रभुदा डाह
तला। तिग एनीगदेसे य्हाङ्ग प्रभु भन्दा
भङ्गबा हिन्ना भिसी म्हन्बा?*

**एनीगदेसे जे लसै परमेश्वरदा मान
तबा गे लउ**

२३ जम्मान ताम लम्याङ्गमुला, तर
जम्मान ताम य्हाङ्गला लागिरी ज्यबा

१०:२१-२२ चु पद अन्छार विश्वासीगदेसे प्रभुला भोज चमाहेन्से विश्वास आलबा म्हिदेन
चबारी मूर्तिगदेला मन्दिररी निबारी आत।

१०:१६ मत्ती २६:२६-२८; मर्कू १४:२२-२४; लूका २२:१९-२० १०:१८ लेवी ७:६

१०:२० व्यव ३२:१७ १०:२२ व्यव ३२:२१

आरे। जम्मान ताम लम्याङ्मुला, तर जम्मान तामसे स्थान्दोगदेदा ज्यबा तना आल।* २४ एनीगदे खालैसेन हाडसे हाडदा ज्यबा लबारी थाम्हाइगो। तर हाडला खिम्जेमदा ज्यबा लबारी म्हाइगो।

२५ एनीगदेला सेम आन्होङ्बाला लागिरी स्या पसलरी निसी खानङ्ग्याम भबा हिन्ना भिसी ड्योइबा छार्बा आलना भसी चउ। २६ तिग्दा भिसम परमेश्वरला बचनरी चुहङ् लसी भ्रिबा मुला, “जम्बुलिङ्देन जम्बुलिङ्गरी मुबा जम्मान स्हे प्रभुलान हिन्ना।”*

२७ स्त्रीष्टदा विश्वास आलबा खालै म्हिसे एनीगदेदा चबारी ड्योइमा एनीगदेदा निबा सेम खजी भिसम हाडला सेम आन्होङ्बाला लागिरी एनीगदेसे तिगै ड्योइबा छार्बा आलना थेरी चबारी पिन्बा जम्मान स्हे चउ। २८ तर खालै म्हिसे एदा “चु मी बलि फुल्बा स्हे हिन्ना” भिजी भिसम थेहङ् पाङ्बा म्हिदेन थेला सेमला लागिरी एसे थे चबा स्हे थाचउ। २९ डाइ एला लागिरी पाङ्बा आहिन, तर एदा थे ताम था याङ्ना लसी पिन्बा म्हिला सेमला लागिरी पाङ्बा हिन्ना। डाइ जे लसै तबा तामरी तिग्दा स्थान्दोला सेमसे निसाफ लपुङ्से? ३० चुदे डाइ परमेश्वरदा धन्यवाद पिन्सी चबान मुला भिसम धन्यवाद पिन्सी चबा

स्हेला लागिरी स्थान्दोसे तिग्दा डादा बिरोध लबा?

३१ थेतबासेलमा एनीगदेसे चसै, थुङ्सै, जे लसैनोन परमेश्वरदा मानदेन जयजयकार पिन्बाला लागिरी एनीगदेसे जम्मान गे लउ। ३२ एनीगदेसे यहूदीदा तसै, अर्गु यहूलला म्हिदा तसै, परमेश्वरला मण्डली तसै खालैदान न्होङ्ना लबा गे थालउ। ३३ जम्मान गेग्याम डाइ जम्मान म्हिदा ताङ्ना लबारी म्हाइबा मुला। डाइ खाइमै हाडदा ज्यबा तगै भिसी खजिबै गे लबारी आम्हाइनी। तर थेनीगदेसे थार्बा याङ्गै भिसी डाइ ल्हानान म्हिगदेला लागिरी ज्यबा गे लबारी म्हाइबा मुला।

११ डाइ स्त्रीष्टसे लबा हङ्गोन लसी भ्रबा मुला, एनीगदेएनोन डाइ लबा हङ्गोन लसी भ्रउ।*

मिडम्हेमेसे थोबो घन्तोःबा

२ डा एनीगदेदेन छ्याम ल्हानान ताङ्बा मुला। तिग्दा भिसम एनीगदेसे डादा सदन ढन्बा मुला, ओच्छे डाइ लोप्बा अन्छार एनीगदे भ्रबा मुला।

३ तर एनीगदेसे चु ताम घोतोःला भिसी डाइ म्हन्बा मुला। स्त्रीष्ट चा जम्मान हेम्फेबेला थोबो† हिन्ना ओच्छे हेम्बो चा मिडला थोबो हिन्ना।

११:३ “थोबो” भिबा चा मुली भिबा हिन्ना।

१०:२३ १ कोर ६:१२ १०:२६ भजन २४:१ ११:१ १ कोर ४:१६

थेहङ् लसीन परमेश्वर चा ख्रीष्टला थोबो हिन्ना। ४ थोबो घप्सी प्रार्थना लबादेन अगमवाणी पाङ्बा हेम्फेबेसे हाडलान थोबोला बेइज्जत लबा हिन्ना। ५ तर थोबो आघप्ना प्रार्थना लबादेन अगमवाणी पाङ्बा मिडम्हेमेसे चा हाडला हेम्बोला बेइज्जत लबा हिन्ना। थेहङ्बा मिडम्हेमे चा क्रा भ्रेसी भ्रबा मिडम्हेमे हङ्बान हिन्ना। ६ स्वालै मिडम्हेमेसे हाडला थोबो आघप्नी भिसम थेसे क्रा भ्रेसी भ्रगै। तर क्रा थाबादेन भ्रेबा चा मिडम्हेमेला लागिरी पे:बा खबा ताम तबासे लमा थेसे थोबो घप्तो:ला। ७ परमेश्वरसे हाडदा उन्बाला लागिरी हेम्फेबेदा हाड हङ्बान स्होजी। थेतबासेलमा हेम्फेबेसे थोबो घप्बारी आत। तिग्दा भिसम हेम्फेबेला गे चा परमेश्वरदा मान लबा हिन्ना। तर मिडम्हेमेला गे चा हेम्फेबेदा मान लबा हिन्ना। ८ तिग्दा भिसम जम्मान भन्दा डाच्छा हेम्फेबे मिडम्हेमेग्याम स्होबा आहिन, तर मिडम्हेमे चा हेम्फेबेग्याम स्होबा हिन्ना। ९ थेहङ् लसीन मिडम्हेमेला लागिरी हेम्फेबे स्होबा आहिन, तर हेम्फेबेला लागिरी मिडम्हेमे स्होबा हिन्ना। १० ओच्छे स्वर्गदूतगदेसे म्राङ्बासे लमा मिडम्हेमेसे हाडला हेम्बोला तहरी चिबा मुला भिबा ताम उन्बाला लागिरी थोबो घप्तो:ला।

११ तसैनोन प्रभुला म्हिगदेला गुडरी मिड हेम्बोला तहरी चितो:ला ओच्छे हेम्बोएनोन मिडला तहरी चितो:ला। १२ तिग्दा भिसम हेम्फेबेग्याम मिडम्हेमे स्होजी। थेहङ् लसीन हेम्फेबे मिडम्हेमेग्याम न्हाला। ओच्छे जम्मान ताम चा परमेश्वरग्यामसेन तबा हिन्ना। १३ चु ताम एनीगदेसेन पक्का लउ, तिग मिडम्हेमेसे थोबो आघप्ना परमेश्वरदेन छ्याम प्रार्थना लमा जेला? १४ थेहङ् लसीन हेम्फेबेसे क्रा न्हजी भिसम थेला लागिरी पे:बा खबा ताम हिन्ना भिसी तिग एनीगदेसे डाच्छाहेन्सेन तसी खबा तामग्याम था याङ्बा आरे? १५ तर चुदे मिडम्हेमेला क्रा हेङ्बा मुसम थेला लागिरी ताङ्बा ताम हिन्ना। तिग्दा भिसम थेला थोबो घप्बाला लागिरीन थेदा हेङ्बा क्रा पिन्बा हिन्ना। १६ तर चु तामदा खालैसे बिरोध लबारी म्हाइजी भिसम य्हाडदेन परमेश्वरला मण्डलीदेन छ्याम चु बाहेक अर्गु खजिबै ठिम आरे।

प्रभु भोज

मती २६:२६-२८; मर्कूस १४:२२-२५;

लूका २२:१४-२०

१७ दाहेन्से डाइ एनीगदेदा चु तामगदेला बारेरी पाङ्मा एनीगदेसे ज्यबा लजी भिसी डाइ पाङ्बारी

११:५ थे धुडरी जम्मासेन डोसेगै भिसी बेर्या मिडम्हेमेगदेला क्रा भ्रेसी पिन्मुबा।

११:७ उत्प १:२६-२७ ११:८ उत्प २:२१-२२ ११:९ उत्प २:२३

आखम। तिग्दा भिसम एनीगदे हुप तबा धुइरी ज्यबा ताम भन्दा ल्हानान आज्यबा ताम लबा मुला। ^{१८}डाच्छा एनीगदे मण्डलीरी हुप तबा धुइरी हाड हाड न्हडरी आढिकमुला भिबा ताम डाइ थे:बा मुला। चु ताम हिन्ना तला भिसी डाइ विश्वास लबा मुला। ^{१९}खाल ठीक मुला, खाल ठीक आरे भिसी डोसेबाला लागिरी एनीगदेला गुडरी आढिकबा तामगदेएनोन खतो:ला।

^{२०}एनीगदे ग्ला गिकरी पोप तसी चबा थुड्बा लबा चा प्रभु भोज आहिन। ^{२१}तिग्दा भिसम चबा थुड्बा धुइरी जम्मासेन खालैसे खालैदा आभ्रान्ना हाड हाडला भो चला। ओच्छे कोइ फोइथान तला, कोइ चा थुड्सी ड्य्होइला। ^{२२}एनीगदेसे हाड हाडलान दिमरी चसै आत? तिग एनीगदेसे परमेश्वरला मण्डलीदा गे आखेल्ला भिसी म्हन्बा? ओच्छे तिगै आरेबा म्हिगदेदा पे:ना लबारी म्हाइबा? दाहेन्से डाइ एनीगदेदा तिग पाङ्से? तिग एनीगदेसे चुहङ् लबा ज्यबा हिन्ना भिसी पाङ्से? अहँ, डाइ आपाङ्।

^{२३}तिग्दा भिसम डाइ जुन ताम प्रभुग्याम लोप्बा मुला थे ताम डाइ एनीगदेदा पाङ्बारी छ्याइबा मुला। प्रभु येशूदा चुड्बाकुनु म्हुनड थेसे गेड थोजी। ^{२४}ओच्छे परमेश्वरदा

धन्यवाद पिन्सी थे गेड क्युइजी। जमाहेन्से “चु एनीगदेला लागिरी डाला ल्हुइ हिन्ना। डादा ढन्सी चिबाला लागिरी एनीगदेसे चुहङ् नोन लउ” भिसी सुङ्जी। ^{२५}थेहङ् लसीन भोज चसी जिन्माहेन्से प्रभुसे खोरे थोसी, “चु खोरेला निङ्गु एनीगदेला लागिरी डाला काग्याम स्होबा छार कबुल हिन्ना। जुन जुन धुइरी एनीगदेसे चु थुङ्ला थे, थे धुइरी डादा ढन्बाला लागिरी सदन चुहङ् लउ” भिसी सुङ्जी। * ^{२६}चुहङ् लसी गेड चबादेन अङ्गुरला निङ्गु थुड्बा धुइरी प्रभु आफेप्खतेधोना प्रभु य्हाङ्ला लागिरी सिजी भिसी एनीगदेसे जम्मादान थे:ना लमुला।

^{२७}थेतबासेलमा जुन म्हिसे तिगै ताम वास्ता आलना प्रभुला गेड चबादेन प्रभुला खोरेग्याम थुङ्ला थेसे प्रभुला ल्हुइदेन कादा बेइज्जत लबासे लमा पापला दोष तला। ^{२८}जम्मान म्हिसे डाच्छा हाडसे हाडदान ठीक मुला कि आरे भिसी च्यासी जे थे गेड चउ, ओच्छे खोरेग्याम थुङ्गो। ^{२९}तिग्दा भिसम जुन म्हिसे प्रभुला ल्हुइला बारेरी आघोना चबा थुड्बा लला, थेसे थेहङ् लसी चबा थुड्बा लबासे लमा सजाय याङ्ला। ^{३०}थेतबासेलमा एनीगदे न्हडरी ल्हानान कमजोरदेन आखम्बा मुला, ओच्छे कोइ कोइ मी सिसी जिन्जी। ^{३१}तर य्हाङ्से

ह्वाडसे ह्वाडदान ठीक मुला कि आरे भिसी च्याजी भिसम य्हाडसे सजाय नाआतोः। ३२तर निसाफ लबा धुइरी जम्बुलिडला दोष स्याप्बा ह्वाड लसी एनीगदेला दोष थास्याप्गै भिसी य्हाडदा प्रभुसे ह्वाडला तहरी थान्ना।

३३थेतबासेलमा ज्योज्यो आले नाना आडागदे, प्रभु भोज चबारी ग्ला गिकरी पोप तबा धुइरी गिकसेम गिकदा भ्रान्गो। ३४खालै फोखेन्बा मुसम थेसे दिमरीन चगै, ओच्छे प्रभु भोज चबा धुइरी एनीगदे खालैसेन परमेश्वरग्याम सजाय थायाङ्गै। अर्गु तामला बारेरी डा खसीन पाङ्गला।

परमेश्वरला आत्मासे पिन्बा मोलम

१२ ज्योज्यो आले नाना आडागदे, परमेश्वरला आत्मासे पिन्बा मोलमला बारेरी एनीगदेसे था याङ्गै भिसी डाइ म्हन्बा मुला। २एनीगदेसे खीष्टदा विश्वास लबा भन्दा डाच्छा तिगै रहेसे एनीगदेदा उन्बा आज्यबा ग्यामरी भ्रसी तामनोन पाङ्गआखम्बा मूर्तिगदेदा तेन्जी भिबा ताम एनीगदेदा थानोन मुला। ३परमेश्वरला आत्मासे कुल्बा अन्छार भ्रबा म्हिगदे खालैसेन “येशू गे आखेल्बा हिन्ना” भिसी आपाङ्ग। ओच्छे परमेश्वरला आत्मासे हो आलतेधोना खालैसेन “येशून प्रभु हिन्ना” भिसी पाङ्गबारी आखम भिबा

ताम एनीगदेसे था याङ्गै भिसी डाइ म्हन्बा मुला।*

४परमेश्वरसे पिन्बा मोलम ल्हानान थरीला मुला, तर मोलम पिन्बा परमेश्वरला आत्मा चा गिक जे हिन्ना।* ५तेन्बाला लागिरी ल्हानान थरीला तामगदे मुला, तर प्रभु चा गिक जे मुला। ६ओच्छे गेगदे ल्हानान थरीला मुला, तर जम्मान म्हिदा गे लखम्बा शक्ति पिन्बा चा थेनोन परमेश्वर जे हिन्ना।

७जम्मान विश्वासीदा हो लबाला लागिरी परमेश्वरला आत्मासे य्हाड जम्मादान मोलम पिन्बा मुला। ८परमेश्वरला आत्मासेन कोइदा बुद्धिला ताम पाङ्गबारी, थेनोन परमेश्वरला आत्मासे कोइदा ज्ञानना ताम पाङ्गबारी मोलम पिन्बा मुला। ९थेनोन परमेश्वरला आत्मासे कोइदा विश्वास लखम्बा, कोइदा आखम्बा म्हिगदेदा खम्ना लबा मोलमगदे पिन्बा मुला। १०ओच्छे कोइदा उदेकला गे लखम्बा, कोइदा अगमवाणी पाङ्गबा, कोइदा ज्यबा आज्यबा आत्मा फेखम्बा, कोइदा थरी थरीला ग्योइ पाङ्गबा, कोइदा चा थेनोन थरी थरीला ग्योइ जम्मादान घोना लखम्बा मोलमगदे पिन्बा मुला। ११तर परमेश्वरला आत्मा गिकनोन हिन्ना ओच्छे चु जम्मान गेगदे थे आत्मा लान हिन्ना। ओच्छे चु मोलम परमेश्वर

ह्वाडसेन म्हन्बा अन्छार गिक गिकदा पिन्ना।

लहुइ गिकरी ल्हानान स्हे मुला

१२ यहाडला लहुइरी ल्हानान स्हे मुला। ल्हानान स्हेगदे मुसैनोन लहुइ चा गिक जे हिन्ना, ख्रीष्टला लहुइएनोन थेहड्बान हिन्ना।* १३ यहाड यहूदी हिन्सै, अर्गु यहूलला म्हि हिन्सै, नोकर हिन्सै आहिन्सै यहाडसे गिकनोन परमेश्वरला आत्माग्याम लहुइ गिकरीन बप्तिस्मा किन्बा मुला। ओच्छे यहाड जम्मासेन परमेश्वरला आत्मा गिकनोन याड्बा मुला।†

१४ तिग्दा भिसम लहुइला स्हे गिकग्यामसे जे म्हिला लहुइ स्होबा आहिन, तर लहुइला ल्हानान स्हेगदे ढिकसी म्हिला लहुइ स्होबा हिन्ना। १५ चुदे काडसे “डा या आहिन, थेतबासेलमा डा लहुइरी मुबा स्हे आहिन” भिजी भिदेमा थे लहुइला स्हे आहिन? हिन्ना। १६ ओच्छे नाब्यडसे “डा मी आहिन, थेतबासेलमा डा लहुइला स्हे आहिन” भिजी भिदेमा थे लहुइला स्हे आहिन? हिन्ना। १७ चुदे लहुइरी जम्मान मीनोन मी जे मुबा हिन्सम तिग्से थे:बा? ओच्छे लहुइरी जम्मान नाब्यड जे मुबा हिन्सम तिग्से थाड नाबा? १८ तर परमेश्वरसे ह्वाडसे

म्हन्बा अन्छार यहाडला लहुइरी जम्मान स्हे ढिकना लसी थान्बा मुला। १९ चुदे थे जम्मान स्हे गिक जे मुबा हिन्सम लहुइनोन आदोसेला मुबा। २० तर लहुइरी ल्हानान स्हेगदे मुसैनोन लहुइ चा गिक जे हिन्ना।

२१ मीसे यादा “ए डादा आतो:” भिसी पाड्आखम, ओच्छे थोबोसेनोन काडदा “एनीगदे डादा आतो:” भिसी पाड्आखम। २२ बरु लहुइरी मुबा कमजोर स्हेगदे भन आरेना आतमुला। २३ यहाडसे जजा म्हन्बा लहुइला थे स्हेगदेदा भन ज्यना लसी थान्मुला। ओच्छे उन्बारी आखम्बा स्हेगदेदा भन जोगब लसी थान्मुला। २४ तर यहाडसे उन्बारी खम्बा स्हेगदेदा चा थेहड् लसी जोगब लसी थान्आतो:। बरु लहुइला कमजोर स्हेगदेदा चा मान लगै भिसी परमेश्वरसे ढिकना लसी थान्जी। २५ लहुइरी मुबा जम्मान स्हेगदे ढिकसी गिकसेम गिकला वास्ता लगै भिसीन हिन्ना। २६ चुदे लहुइला स्हे गिकदा दुख तजी भिसम लहुइला जम्मान स्हेदा दुख तला। ओच्छे लहुइला स्हे गिकसे मान याड्जी भिसम लहुइला जम्मान स्हेगदे ताड्ला।

२७ एनीगदे जम्मान ख्रीष्टला लहुइ हिन्ना, ओच्छे एनीगदे गिक गिक

१२:१३ “परमेश्वरला आत्मा गिकनोन याड्बा मुला” भिबादा ग्रीक बाइबलरी आत्मा गिकनोन थुड्बारी पिन्बा मुला भिसी भिबा मुला।

१२:१२ रोमी १२:४-६

ख्रीष्टला ल्हुइला स्हेगदे हिन्ना।
 २८ परमेश्वरसेन मण्डलीरी जम्मान
 भन्दा

डाच्छा मुल चेलागदे,
 जमाहेन्से अगमवक्तागदे,
 जमाहेन्से स्थहान्दोदा लोप्बा
 म्हिगदे,
 ओच्छे उदेकला गे लबा म्हिगदे,
 आखम्बा म्हिदा खम्ना लबा मोलम
 याड्बा म्हिगदे,
 स्थहान्दोदा हो लबा म्हिगदे,
 जम्मान ताम ढिकना लबा
 म्हिगदे,
 ओच्छे थरी थरीला ग्योइ पाड्बा
 म्हिगदेदा धम्सी थान्बा
 मुला।*

२९ तिग जम्मान म्हिगदे मुल चेला
 हिन्ना? आहिन। तिग जम्मान म्हिगदे
 अगमवक्ता हिन्ना? आहिन। तिग
 जम्मान म्हिगदे स्थहान्दोदा लोप्बा
 म्हि हिन्ना? आहिन। तिग जम्मान
 म्हिगदेसे उदेकला गे लला? आल।
 ३० तिग जम्मान म्हिगदेसे आखम्बा
 म्हिदा खम्ना लबा मोलम याड्बा?
 आयाड्। तिग जम्मान म्हिगदेसे थरी
 थरीला ग्योइ पाड्बा? आपाड्। तिग
 जम्मान म्हिगदेसे थे थरी थरीला
 ग्योइ जम्मादान घोना लबारी खम्ला?
 आखम। ३१ तर एनीगदेसे अफ्न घेन
 घेन मोलम याड्बा सेम लउ।

माया चा जम्मान भन्दा घेन मोलम
 हिन्ना

ओच्छे एनीगदेदा डाइ भन जम्मान
 भन्दा ज्यबा ग्याम उन्ना।

१३ डाइ म्हिगदेदेन स्वर्गदूत-
 गदेला ग्योइरी ताम
 पाड्सैनोन स्थहान्दोदा माया आलनी
 भिसम डा चा स्याडदेन बुजेल
 हड्बा जे तला। २ डाइ अगमवाणी
 पाड्खम्सैनोन म्हिला ज्ञान बुद्धिसे
 घोआखम्बा ताम घोसैनोन, जम्मान
 ज्ञान बुद्धि याड्सैनोन, ओच्छे डादेन
 छ्याम गडगदे ले:खम्बा विश्वास
 मुसैनोन डाइ स्थहान्दोदा माया
 लआखम्नी भिसम डा तिगैनोन
 आहिन।* ३ चुदे डाइ डाला जम्मान
 धन सम्पत्ति स्थहान्दोदा भो लसी
 पिन्जी, ओच्छे डाइ डाला ल्हुइनोन
 मेरी खाड्पुड्सैनोन^१ डाइ स्थहान्दोदा
 माया आलनी भिसम डादा तिगै ज्यबा
 आत।

४ स्थहान्दोदा माया लबा म्हिसे
 जम्मान ताम भ्रान्बारी खम्ला ओच्छे
 दया लला। स्थहान्दोदा डाह आल,
 डा जे ज्यबा भिसी आपाड् ओच्छे
 घेन दोसीनोन आभ्र। ५ स्थहान्दोदा
 माया लबा म्हि चा ह्विक्बा आरेबा
 म्हि हड्बा आत मुला, हाडदा जे
 ज्यबा तगै भिसीएनोन आम्हन,

१३:३ थे धुइरी म्हिदा सजाय पिन्तो:सम मेसे खाड्मुबा।

१२:२८ एफि ४:११ १३:२ मत्ती १७:२०; २१:२१; मर्कू ११:२३

स्यहान्दोदेन आछेर, ओच्छे ह्वाडदा बिरोध लबा तामलाएनोन वास्ता आल। ६स्यहान्दोदा माया लबा म्हि आज्यबा तामरी आताड्, थे सत्य तामरी जे ताड्ला। ७स्यहान्दोदा माया लबा म्हिसे जम्मान ताम जोगब लला, जम्मान तामएनोन विश्वास लला, ओच्छे जम्मान ताम तला भिसी आश लला, जम्मान तामरी कोड्सी चिला।

८माया खाइमै म्हासी आनि। तर अगमवाणी पाड्बा खलाला, थरी थरीला ग्योड पाड्बा खलाला, ओच्छे ज्ञान बुद्धिला तामगदे गे आखेलबा तला। ९य्हाडसे पाड्बा अगमवाणीदेन य्हाडला ज्ञान बुद्धि पूरा आरे। १०तर जम्मान ताम पूरा तमाहेन्से चा पूरा आतबा जम्मान तामगदे म्हासी निला।


११डा जजा मुबा धुइरी डाइ जत्धुगुलान ताम पाड्मुबा, ओच्छे जत्धुगुसे म्हन्बा तामनोन म्हन्मुबा, जत्धुगुसे घोबा हड् लसीन घोमुबा। तर भ्योन तमाहेन्से डाइ जत्धुगुला जम्मान बानीबेहोरगदे खलाजी। १२दान्दे चा य्हाडसे ज्यना लसी आम्राड्बा ऐनारी म्राड्बा हड् जे म्राड्मुला, तर लिच्छा चा ज्यना लसी म्राड्ला। दान्दे डाइ पूरान ताम आघोसैनोन थे धुइरी चा परमेश्वरसे डाला बारेरी जम्मान ताम था याड्बा हड् डाइएनोन जम्मान ताम घोला।

१३विश्वास, आशदेन माया चा खाइमै आम्हा। तर चु सोम न्हडरी घ्रेन चा माया हिन्ना।

अगमवाणीदेन अर्गु ग्योड

१४ थेतबासेलमा एनीगदेसे ल्हानान म्हाइदोबा चा माया हिन्ना। ओते जे आहिन, परमेश्वरला आत्मासे पिन्बा मोलमगदे याड्बारीनोन ल्हानान सेम लउ। ओच्छे अगमवाणी पाड्बारी चा भन ल्हानान सेम लउ। २तिगदा भिसम अर्गु ग्योड^१ पाड्बा म्हिसे म्हिगदेदेन छ्याम आहिन, परमेश्वरदेन छ्याम ताम पाड्मुला। थेसे परमेश्वरला आत्माला शक्तिग्याम म्हिसे था आयाड्बा ताम पाड्बासे लमा स्यहान्दो खालै म्हिसे आघोमुला। ३तर अगमवाणी पाड्बा म्हिसे स्यहान्दोगदेसे घोखम्बा ताम पाड्मुला। थेसे पाड्बा तामग्याम म्हिगदेसे विश्वासरी कोड्बा आँटदेन शान्ति याड्ला। ४अर्गु ग्योड पाड्बा म्हिसे ह्वाडलान विश्वास कोड्ना लला। तर अगमवाणी पाड्बा म्हिसे चा मण्डलीलान विश्वास कोड्ना लला। ५एनीगदे जम्मासेन अर्गु ग्योड पाड्गै भिसी डाइ म्हन्बा मुला। तर थे भन्दा भन ल्हाना चा एनीगदेसे अगमवाणी पाड्गै भिसी डाइ म्हन्बा मुला। मण्डलीला विश्वास

१४:२ “अर्गु ग्योड” भिबा चा ग्रीक अन्धार खालै म्हिसे आसेबा ग्योड पाड्खम्बा भिबा हिन्ना। (चु ताम १४:४, ५, १३, १४, १८, २२, २६, २७, २८, ३६ पदगदेरीनोन मुला।)



वीणा (१४:७)

कोड्ना लबाला लागिरी अर्गु ग्योइ
म्हिगदेदा घोना लसी पिन्बा म्हि खालै
आरेसम अर्गु ग्योइ पाङ्बा म्हि भन्दा
अगमवाणी पाङ्बा म्हि चा घेन हिन्ना।

६ज्योज्यो आले नाना आडागदे,
चुदे डा एनीगदे मुबा ग्लारी खसी
अर्गु ग्योइ जे पाङ्जी भिसम तिग
एनीगदेदा ज्यबा तला? आत। तर
चुदे डा एनीगदे मुबा ग्लारी खसी
परमेश्वरसे उन्बा ताम, ज्ञान बुद्धिला
ताम, अगमवाणीदेन तिगै लोप्तो:बा
ताम लोप्जी भिसम एनीगदेदा ज्यबा
तला। ७बाँसुरीदेन वीणा ह्याप्मा थेला
काइ ज्यना लसी आथोन्नी भिसम
तिग ह्याप्जी भिसी खाहङ् लसी था
याङ्बा? ८चुदे बिगुल ह्याप्मा ज्यना
लसी आथे:नी भिसम लडाइ लबाला
लागिरी खाहङ् लसी तयार तला?†

६थेहङ् लसीन एनीगदेसेनोन अर्गु
ग्योइरी आघोबा ताम पाङ्जी भिसम
एनीगदेसे तिग पाङ्जी भिसी खाल्से
था याङ्से? एनीगदेसे पाङ्बा चा तिगै
गे आखेल्बा तला। १०जम्बुलिडरी
ल्हानान थरीला ग्योइगदे मुला। थे
ग्योइगदे न्हडरी खालै म्हिसे आघोबा
ग्योइ चा गिकनोन आरे। ११चुदे
खालै म्हिसे पाङ्मा डाइ आघोनी
भिसम थे डाला लागिरी विदेशी तला,
ओच्छे थेला लागिरी डा विदेशी
तला। १२थेहङ् लसीन एनीगदेसेनोन
परमेश्वरला आत्माग्याम याङ्बा
मोलमगदे याङ्बारी ल्हानान सेम
लबासे लमा मण्डलीदा ल्हेना लबाला
लागिरी जुन मोलमसे आँट याङ्सी
भङ्ना लला थे मोलम म्हाइगो।

१३थेतबासेलमा अर्गु ग्योइ पाङ्बा
म्हिसे थे ताम घोना लखम्बा शक्ति
याङ्बाला लागिरी प्रार्थना लतो:ला।
१४तिगदा भिसम डाइ अर्गु ग्योइरी
प्रार्थना लमा डाला आत्माग्याम प्रार्थना
लला। तर थे ताम डाइएनोन आघो।
१५थेहङ् भिसम डाइ तिग लसे? डाइ
आत्माग्याम प्रार्थना लला, तर डाइ
घोबाला लागिरी सेमसेनोन प्रार्थना
लला। ओच्छे आत्मासे परमेश्वरला
जयजयकार लसी व्हाइ गोला, तर
डाइ घोबाला लागिरी सेमसेनोन
व्हाइ गोला। १६चुदे एसे आत्माग्याम

१४:८ यहूदीगदेला ठिम अन्छार लडाइ लबाला लागिरी तयार तउ भिसी पाङ्तो:मा बिगुल
ह्याप्मा।

परमेश्वरला जयजयकार लसी
धन्यवाद पिन्सी प्रार्थना लमा स्थान्दो
म्हिगदेसे आघोनी भिसम खाह्ङ्
लसी, “आमेन” भिखम्ला? १७ एसे
ज्यना लसी धन्यवाद पिन्ना तला, तर
स्थान्दो म्हिसे आघोनी भिसम थेला
विश्वास कोङ्बा आत।

१८ डाइ परमेश्वरदा धन्यवाद पिन्ना,
तिग्दा भिसम एनीगदेसे भन्दा भन
डाइ ल्हानान रेम अर्गु ग्योइ पाङ्मुला।
१९ तर मण्डलीरी आघोबा ग्योइग्याम
हजार च्युइ ताम पाङ्बा भन्दा मी बरु
डाइ हाङलान सेमग्याम गोर डा ताम
जे पाङ्सी स्थान्दोदा लोप्बा चा ज्यबा
तला भिसी डाइ म्हन्बा मुला।

२० ज्योज्यो आले नाना आडागदे,
एनीगदेसे कोलागदेसे म्हन्बा हङ्
लसी थाम्हन्गो। आज्यबा तामगदेला
लागिरी एनीगदे तिगै आसेबा कोलागदे
हङ्बान दोगो। तर म्हन्बा धुइरी चा
पाको म्हिसे म्हन्बा हङ्बान म्हन्गो।
२१ बचनरीनोन परमप्रभुसे चुहङ् भिसी
सुङ्बा मुला,

“अर्गु ग्योइ पाङ्बा म्हिगदेदेन
विदेशीग्याम

डाइ चु म्हिगदेदेन छ्याम ताम
पाङ्ला।

तसैनोन थेनीगदेसे डाला ताम
ड्यान्बा सेम आल।”*

२२ थेतबासेलमा अर्गु ग्योइगदे
पाङ्बा चा विश्वास लबा म्हिगदेला

लागिरी आहिन, विश्वास आलबा
म्हिगदेला लागिरी चिनु हिन्ना। तर
अगमवाणी पाङ्बा चा विश्वास
आलबा म्हिगदेला लागिरी आहिन,
विश्वास लबा म्हिगदेला लागिरी
हिन्ना।

२३ थेतबासेलमा एनीगदे मण्डलीरी
हुप तबा धुइरी अर्गु ग्योइ पाङ्बा
धुइरी विश्वास आलबा म्हिगदेदेन थे
ताम आघोबा म्हिगदे थेरी खजी भिसम
थेनीगदेसे एनीगदेदा म्योजीम भिसी
भिला। २४ तर जम्मासेन अगमवाणी
पाङ्बान लबा धुइरी विश्वास आलबा
खालै म्हिदेन घोबा सेम थोसी खबा
म्हि थेरी खजी भिसम जम्मासेन पाङ्बा
तामग्याम थेसे हाङसे लबा पाप था
याङ्ला ओच्छे थेसे हाङ ठीक मुला
कि आरे भिसी च्याला। २५ खालैदा था
आरेबा थेला सेमला तामगदेएनोन था
याङ्ला। जमाहेन्से रूलुप तसी थेसे
परमेश्वरदा धन्यवाद पिन्ना, ओच्छे
“पक्कान, एनीगदेला गुडरी परमेश्वर
मुला” भिसी थेसे पाङ्ला।

ठीक लसी संगती लउ

२६ ज्योज्यो आले नाना आडागदे,
डाइ एनीगदेदा पाङ्बारी म्हाइबा ताम
चा चुनोन हिन्ना, एनीगदे हुप तसी
संगती लबा धुइरी कोइसे व्हाइ गोला,
कोइसे बचनग्याम लोप्ला, कोइसे
परमेश्वरसे उन्बा ताम घोना लला,

कोइसे अर्गु ग्योइ पाङ्ला, कोइसे थे ग्योइग्याम पाङ्बा ताम जम्मादान घोना लला। चु जम्मान तामगदे चा मण्डलीदा भङ्ना लबारी लतोःला। २७ एनीगदे न्हङरी खालैसे अर्गु ग्योइ पाङ्मुला भिसम, पालो पालो लसी न्ही सोमसे जे पाङ्गो, स्थान्दो गिकसे चा थे अर्गु ग्योइ जम्मादान घोना लतोःला। २८ तर थे ताम घोना लबारी थेरी खालै म्हि आतनी भिसम थे ताम पाङ्बा म्हि चा मण्डलीरी कुटिसी चिगै। ओच्छे थे हाङनोन परमेश्वरदेन छ्याम जे ताम लगै।

२९ अगमवाणी पाङ्बा म्हि चा न्ही सोमधोना तगै, ओच्छे स्थान्दो म्हिगदेसे चा थेनीगदेसे पाङ्मा परमेश्वरग्याम खबा हिन्ना कि आहिन भिसी च्यागै। ३० तर थेरी मुबा म्हिगदे न्हङरी गिकदा परमेश्वरसे तिगै ताम उन्सी पाङ्पुङ्जी भिसम डाच्छा पाङ्बान लबा म्हि चा तिगै आपाङ्ना कुटिसी चिगै। ३१ अगमवाणी पाङ्बा एनीगदे जम्मासेन पालो पालो लसी अगमवाणी पाङ्खम्ला, ओच्छे ड्यान्बा म्हिगदेसे लोप्खम्ला ओच्छे जम्मासेन आँट याङ्ला। ३२ अगमवक्तागदेसे हाङला सेमदा हाङसेन तहरी थान्तोःला। ३३ तिगदा भिसम परमेश्वर अलमल तना लबा परमेश्वर आहिन, तर शान्ति पिन्बा परमेश्वर हिन्ना।

थेहङ् लसीन परमेश्वरला म्हिगदेसे जम्मान मण्डलीला ठिम अन्छार,

३४ मण्डलीरी संगती लबान लबा धुइरी म्रिडम्हेमेगदे कुटिसी चितोःला। थे धुइरी थेनीगदेसे ताम पाङ्आम्याङ्। तर हाङला ठिमसे पाङ्बा अन्छार थेनीगदे तहरी चितोःला। ३५ तिगै तामला बारेरी ड्योइबा सेम मुसम थेनीगदेसे दिमरी हाङ हाङला हेम्बोदेन छ्याम ड्योइगै। तिगदा भिसम मण्डलीरी ताम पाङ्बा चा म्रिडम्हेमेगदेला लागिरी पेःबा खबा ताम हिन्ना।

३६ तिग परमेश्वरला बचन एनी कोरिन्थला म्हिगदेसे थेःना लबारी शुरु लबा हिन्ना? आहिन। तिग परमेश्वरला बचन एनीगदेसे जे थेःबा हिन्ना? आहिन। ३७ खालै म्हिसे हाङसे हाङदान अगमवक्ता अथवा परमेश्वरला आत्माग्याम मोलम याङ्बा म्हि हिन्ना भिसी म्हन्मुला भिसम, थेसे डाइ भिबा चु ताम प्रभुसे कुल्बा ताम हिन्ना भिसी था याङ्तोःला। ३८ तर खालै म्हिसे चु तामगदेदा वास्ता आलनी भिसम थेला तामदाएनोन खालैसेन वास्ता आल।

३९ थेतबासेलमा डाला ज्योज्यो आले नाना आडागदे, अगमवाणी पाङ्बारी ल्हानान सेम लउ, ओच्छे अर्गु ग्योइ पाङ्बा म्हिगदेदाएनोन थाकागो। ४० तर जम्मान गे ज्यना लसी ढिकना लसी लतोःला।

येशू ख्रीष्ट सिबाग्याम सोबा

१५ दाहेन्से ज्योज्यो आले नाना आडागदे, डाइ एनीगदेदा थेःना लबा थार्बा पिन्बा समाचारला

बारेरी डाइ एनीगदेदा दोःसी पाङ्गला।
थे समाचाररी विश्वास लसी एनीगदे
थेनोन अन्छार भ्रबान मुला।^२ चुदे डाइ
थेःना लबा थाबा पिन्बा समाचाररी
विश्वास लबा आख्खानी भिसम जे
एनीगदेसे थाबा याङ्गला, आहिन्सम
एनीगदेसे लबा विश्वास गे आखेलबा
तला।

^३ तिग्दा भिसम परमेश्वरला बचन
अन्छार ख्रीष्ट यहाङला पापला
लागिरी सिजी भिसी डाइ था याङ्गला
मुल तामनोन डाइ एनीगदेदा थेःना
लबा मुला।^{*} ^४ थेदा लहुजी ओच्छे
परमेश्वरला बचन अन्छार थे
सोमरेमाकुनु सिबाग्याम दोःसी
सोजी।^{*} ^५ ओच्छे थेदा पत्रुससे
म्राङ्गी, जमाहेन्से थेदा च्युक न्ही
मुल चेलासे म्राङ्गी।^{*} ^६ जमाहेन्से
थेदा हाङदा विश्वास लबा ग्यार्जा
डा भन्दा ल्हाना ज्योज्यो आले नाना
आडागदेसे तिक्खुरीन म्राङ्गी।
थेनीगदे न्हङला ल्हाना हङ्गला म्हिगदे
दान्देधोनाएनोन मुला, तर कोइ कोइ
चा सिसी जिन्जी।^७ जमाहेन्से थेदा
याकूबसे म्राङ्गी, ओच्छे लिच्छा
जम्मान मुल चेलागदेसे म्राङ्गी।^८ थेदा
जम्मान भन्दा लिच्छा चा डाइ म्राङ्गी।
थे धुइरी चा डा ला आख्खोना न्हबा
कोला हङ्गबान मुबा।^{*}

^९ तिग्दा भिसम जम्मान मुल चेलागदे
डा भन्दा घेन हिन्ना, थेनीगदे न्हङरी
डा चा तिगैनोन आहिन। तिग्दा भिसम
डाइ परमेश्वरला मण्डलीदा ल्हानान
दुख पिन्बासे लमा डा मुल चेला
भिबाधोनाला आरे।^{*} ^{१०} तर दान्दे डा
परमेश्वरला दयामायासे लमान मुल
चेला दोबा मुला। ओच्छे थेसे डादा
लबा दयामाया खेरोरी आनिनी। बरु
डाइ स्थान्दो मुल चेलागदेसे भन्दा
ल्हानान गे लजी। तर चु जम्मान गे
डाइ लबा आहिन, डादेन छ्याम मुबा
परमेश्वरला दयामायासेन हिन्ना।
^{११} थेतबासेलमा डाइ थेःना लसै,
थेनीगदेसे थेःना लसै, डन्से थेःना
लबा ताम चा गिकनोन हिन्ना। ओच्छे
थेनोन तामरी एनीगदेसे विश्वास लबा
मुला।

यहाङ सिबाग्याम सोला

^{१२} डन्से चा ख्रीष्ट सिबाग्याम सोजी
भिसी थेःना लसी भ्रमुला भिसम
एनीगदे न्हङला कोइ कोइसे चा तिग्दा
सिबागदे दोःसी आसो भिसी पाङ्गला?
^{१३} तर चुदे सिबागदे दोःसी आसो
भिसम ख्रीष्टएनोन सिबाग्याम सोबा
आहिन। ^{१४} चुदे ख्रीष्ट सिबाग्याम
आसोबा हिन्सम डन्से थेःना लबा ताम
गे आखेलबा तला, ओच्छे एनीगदेसे

१५:३ यशै ५३:५-१२ १५:४ भजन १६:८-१०; मत्ती १२:४०; मुल २:२४-३२

१५:५ मत्ती २८:१६-१७; मर्क १६:१४; लूका २४:३४, ३६; यूह २०:१६ १५:८ मुल ६:३-६

१५:९ मुल ८:३

लबा विश्वासएनोन गे आखेलबा तला।
 १५थे भन्दाएनोन डनी परमेश्वरला
 बारेरी लुसीला ताम पाड्बा म्हि दोला।
 तिगदा भिसम परमेश्वरसे ख्रीष्टदा
 सिबाग्याम सोना लजी भिसी डन्से
 परमेश्वरला बारेरी थे:ना लबा मुला।
 तर च्यागो, सिबागदे दो:सी आसोबा
 हिन्सम परमेश्वरसे ख्रीष्टदाएनोन
 सोना आलसेला मुबा। १६सिबागदे
 आसोमुला भिसम परमेश्वरसेनोन
 ख्रीष्टदा सोना लबा आहिन। १७ख्रीष्ट
 सिबाग्याम आसोबा हिन्सम एनीगदेसे
 लबा विश्वास गे आखेलबा तला,
 ओच्छे एनीगदे अफ पापरीन तला।
 १८थेहड् भिसम ख्रीष्टदा विश्वास
 लसी सिबा म्हिगदेएनोन जम्मान
 सिबाला सिबान तजी। १९चुदे चु
 जुनी मुदेधोनाला लागिरी जे य्हाडदा
 ख्रीष्टग्याम ज्यबा तला भिसी आश
 लबा हिन्सम स्थान्दो जम्मान म्हिगदे
 भन्दा य्हाड चा ल्हाना दया याड्तो:बा
 म्हि दोला।

२०तर ख्रीष्ट मी सिबाग्याम सोबा
 हिन्ना। सिबागदे न्हडग्याम ख्रीष्ट
 जम्मान भन्दा डाच्छा सोसी स्थान्दो
 सिबागदेएनोन सोला भिसी उन्बा
 मुला। २१तिगदा भिसम म्हि गिकसे
 लमान जम्मान म्हि सिबा मुला। थेहड्

लसीन गिकसे लमान सिबागदेएनोन
 दो:सी सोला। २२आदमग्याम †
 जम्मान म्हि सिबा मुला। थेहड् लसीन
 ख्रीष्टग्याम चा जम्मान म्हि सोला।
 २३तर जम्मान म्हि हाड हाडला
 पालो अन्छार सिबाग्याम सोला।
 ख्रीष्ट चा सिबाग्याम जम्मान भन्दा
 डाच्छा सोजी। ओच्छे ख्रीष्ट दो:सी
 फेप्खबा धुइरी चा थेदा विश्वास
 लबा म्हिगदेएनोन सिबाग्याम सोला।
 २४जमाहेन्से चु जम्बुलिङ नाश
 तला। थे धुइरी ख्रीष्टसे जम्मान
 अधिकारगदे, शक्तिगदेदेन शासन
 लबागदेदा नाश लसी परमेश्वरला
 य्हुल्सा परमेश्वर आबादान जिम्मा
 पिन्ना। २५तिगदा भिसम ख्रीष्टसे
 जम्मान शत्रुगदेदा भेना लसी हाडला
 काड धिरी आथान्तेधोना थेसे शासन
 लतो:ला।* २६जम्मान भन्दा लिच्छा
 चा शत्रु कालदा नाश लबान मुला।
 २७तिगदा भिसम बचनरी “परमेश्वरसे
 जम्मान स्हेगदे ख्रीष्टला स्थाप धिरी
 थान्ना” भिसी भिबा मुला। चु भिबा चा
 परमेश्वरएनोन ख्रीष्टला तहरी तला
 भिसी पाड्बा आहिन। तर परमेश्वरसे
 जम्मान स्हेगदेथोरी ख्रीष्टदा शासन
 लपुड्ला भिबा हिन्ना।* २८जम्मान
 स्हे ख्रीष्टला शासनरी भमाहेन्से

१५:२२ “आदम” चा परमेश्वरसे स्होबा जम्मान भन्दा डाच्छाला म्हि हिन्ना। आदमसे
 परमेश्वरसे कुल्बा ताम आड्यान्ना पापी दोजी। आदम पापी दोबासे लमा य्हाडएनोन पापी
 दोजी।

१५:२५ भजन ११०:१ १५:२७ भजन ८:६

ख्रीष्टएनोन परमेश्वरला तहरी धन्छ्याला। ओच्छे जम्मान स्हेथोरी परमेश्वरसेन शासन लला।

२६सिबाग्याम दोःसी आसोबा हिन्सम सिबागदेला लागिरी बप्तिस्मा किन्बा म्हिगदेदा तिग फाइदा तला? चुदे सिबाग्याम आसो भिसम थेनीगदेसे थेला लागिरी तिगदा बप्तिस्मा किन्बा? ३०ओच्छे डनीएनोन तिगदा सदन हाडला ज्यान गोजाला धाररी थान्सी भ्रसे? ३१ज्योज्यो आले नाना आडागदे, एनीगदे य्हाडला प्रभु ख्रीष्ट येशूदेन छ्याम गिक तबासे लमा डा ल्हानान ताड्बा मुला। थेतबासेलमा डाइ सेमहेन्सेन चु ताम पाङ्ला, “डा धिन धिननोन सिबारी तयार मुला।” ३२म्हिसे म्हन्बा अन्छार जे एफिसस शहररी डा हि जन्तुदेन^१ छ्याम छेबा तामसे डादा तिग फाइदा तला? चुदे सिबागदे दोःसी आसो भिसम म्हिगदेसे पाङ्बा हङ्गोन

“य्हाडएनोन चबा थुङ्बा लइ,
तिगदा भिसम न्हङ्गर मी य्हाड
सिनोन सिला!”*

३३चु तामरी एनीगदे भ्युक्याब थातउ। आज्यबा म्हिला संगत लजी भिसम ज्यबा बानीबेहोरएनोन न्होङ्ला। ३४दाहेन्से एनीगदेसे ठीक ताम म्हन्गो, ओच्छे पाप थालउ। तिगदा भिसम एनीगदे न्हङ्ला गाते म्हिसे मी

परमेश्वरदा डोसेबान आरे। डाइ चु ताम पाङ्मा एनीगदेदा पेःबा खतोःबा।

सिबाग्याम सोबा ल्हुइ

३५तर खालै म्हिसे “सिबागदे दोःसी खाहङ् लसी सोला? ओच्छे सोमाहेन्से थेनीगदेला ल्हुइ खाहङ्बा तला?” भिसी ड्योइला। ३६मूर्ख म्हि! एसे जुन स्हेला ब्लु ढ्वला थे ब्लु आनइतेधोना आफुइ। ३७एनीगदेसे ग्वा तसै, अर्गु तिगैला ब्लु मुसै, थेला गेडा ढ्वबा हिन्ना, तर दोङ्गोन ढ्वबा आहिन। ३८तर परमेश्वरसे हाडसे म्हन्बा अन्छार थे ब्लुगदेदेन अर्गु ब्लुगदेदा जेबा ल्हुइ पिन्ना। ३९जम्मान ल्हुइ खाल गिकलान आत। म्हिला ल्हुइ अर्गु खाल्ला, जन्तुगदेला ल्हुइ अर्गु खाल्ला, चरागदेला ल्हुइ अर्गु खाल्ला ओच्छे तार्डागदेला ल्हुइ अर्गु खाल्ला तला।

४०मुरी मुबा स्हेगदेला हाड हाडलान रुपदेन य्हाल तला ओच्छे जम्बुलिडरी मुबा स्हेगदेलाएनोन हाड हाडलान रुप तला। ४१धिनीला य्हाल अर्गुन खाल्ला तला, लनीला य्हाल अर्गु खाल्ला तला ओच्छे सारगदेला य्हाल अर्गुन खाल्ला तला। तिगदा भिसम जम्मान सारगदेला य्हाल गिकनोन आत।

४२सिबागदेएनोन थेहङ् लसीन सोला। सिमाहेन्से ल्हुबा ल्हुइ

१५:३२ “हि जन्तु” भिबा चा पावलदा एफिससरी बिरोध लबा म्हिगदे हिन्ना।

१५:३२ यशै २२:१३

चा नइसी निला, तर सिबाग्याम दोःसी सोमाहेन्से चा खाइमै आसि।

४३सिमाहेन्से लहुबा यहाडला लहुइ आज्यबादेन कमजोर तला। ओच्छे सिबाग्याम सोमाहेन्सेला लहुइ जेबादेन शक्तिशाली तला। ४४लहुबा धुइरी स्या काला लहुइरी लहुला, तर सोबा धुइरी थे आत्माला लहुइरी सोला। स्यादेन काला लहुइ तला भिसम आत्माला लहुइएनोन तनोन तला।

४५थेतबासेलमा बचनरीनोन, “जम्मान भन्दा डाच्छाला म्हि आदम चा सोबा म्हि दोजी” भिसी भिबा मुला। तर लिच्छाला आदम[†] चा स्यहान्दोदा जुकजुकधोनाला जुनी पिन्बा आत्मा तजी।* ४६आत्माला लहुइ डाच्छा खबा आहिन, तर स्या काला लहुइ चा डाच्छा खबा हिन्ना। जमाहेन्से जे आत्माला लहुइ खबा हिन्ना। ४७डाच्छाला म्हि आदम चा जम्बुलिडला साप्राग्याम स्होबा म्हि मुबा। तर थे भन्दा लिच्छाला म्हि ख्रीष्ट चा स्वर्गग्याम फेप्खबा मुबा। ४८जम्बुलिडरी मुबा म्हिगदे चा थे साप्रासे स्होबा म्हि हड्बान मुला, ओच्छे स्वर्गरी मुबा म्हिगदे चा स्वर्गग्याम फेप्खबा म्हि हड्बान मुला। ४९दान्दे यहाडसे साप्रासे स्होबा म्हिला रुप किन्बा हड् लसी लिच्छा

चा यहाडसे स्वर्गग्याम फेप्खबा म्हिला रुप किन्म्याडला।

५०ज्योज्यो आले नाना आडागदे, डाइ पाड्बारी म्हाइबा ताम चा चुनोन हिन्ना, चु स्या काला लहुइदा परमेश्वरला यहुल्सारी वाड्बा हक आरे। ओच्छे नाश तसी निबा लहुइसे खाइमै आसिबा जुनी आयाड्। ५१च्यागो, डाइ एनीगदेदा म्हिसे था आयाड्बा ताम गिक पाड्ला। यहाड जम्मान मी आसि, तर यहाड जम्मालान लहुइ पोला। ५२यहाडला मी चीम जे तमा छिन्नडरीन जम्मान भन्दा लिच्छारेम बिगुलला काइ थेःला। जमाहेन्से तुरुन्तन सिबागदे दोःसी खाइमै नाश आतबा जुनी किन्सी सोला, ओच्छे यहाडला लहुइ पोला।* ५३तिगदा भिसम सिबा लहुइ खाइमै आसिबा ततोःला, ओच्छे चु नइसी निबा लहुइ दोःसी खाइमै आनइबा ततोःला। ५४सिबा लहुइ खाइमै आसिबादेन नइसी निबा लहुइ खाइमै आनइबा दोमाहेन्से बचनरी “कालदाएनोन ढाजी” भिसी भिबा ताम पूरा तला।*

५५“काल एसे खानड ढाबा मुला?

काल खाइ एला शक्ति?”*

५६पापग्याम कालसे दुख पिन्बा शक्ति याड्ला ओच्छे ठिमग्याम पापसे शक्ति याड्ला। ५७तर परमेश्वरदा धन्यवाद

१५:४५ “लिच्छाला आदम” भिबा चा ख्रीष्ट हिन्ना।

१५:४५ उत्प २:७ १५:५१-५२ १ थेस ४:१५-१७ १५:५४ यशै २५:८

१५:५५ होशे १३:१४

तगै, थेसे य्हाडदा य्हाडला प्रभु येशू
स्त्रीष्टग्याम ढाना लबान मुला।

^{५८}थेतबासेलमा डाला सेम निबा
ज्योज्यो आले नाना आडागदे, एनीगदे
विश्वासरी कोङ्सी याडयोड आतना
चिउ। ओच्छे भन्सी प्रभुला गे लउ।
तिग्दा भिसम एनीगदेसे दुख लसी
लबा प्रभुला गे खाइमै खेरोरी आनि
भिबा ताम एनीगदेदा थानोन मुला।

यरूशलेमरी मुबा परमेश्वरला म्हिगदेला लागिरी भेटी

१६ दाहेन्से डाइ परमेश्वरला
म्हिगदेला लागिरी भेटी
हुप्बाला बारेरी भिबान मुला, डाइ
गलातियाला मण्डलीदा पाङ्बा हङ्
लसीन एनीगदेसे हुप्गो। ^२एनीगदेसे
ह्वाडसे गे लसी स्होबा टाङगाग्याम
साताला शुरुला धिनकुनु सातैदडसेन
जजाकर भेटी हुप्सी थान्गो। थेहङ्
लजी भिसम डा खबा धुइरी एनीगदेसे
भेटी हुप आतोः। ^३ओच्छे डा
खमाहेन्से एनीगदेसे धम्बा म्हिगदेदा
डोसेना लबा चिठी पिन्ना। जमाहेन्से
थेनीगदेसेन थे भेटी यरूशलेमरी भोर्सी
निला। ^४ओच्छे डाएनोन निमा ज्यबा
तला भिसम थेनीगदे डादेन छ्यामनोन
निला।

पावलसे ग्ला ग्लारी निबा सेम लबा

^५डा माकेडोनिया तसी खबा
धुइरी एनीगदेदेन छ्याम हुप तबारी
खला। तिग्दा भिसम दान्दे चा डा

माकेडोनिया तसी निबारी छ्याइबा
मुला। ^६एनीगदेदेन छ्याम डा तिगै
धिनधोना चिखम्ला तला, तजी
भिसम सेख् भरनोन एनीगदेदेन छ्याम
चिखम्ला। जमाहेन्से डा जुन ग्लारी
निसैनोन एनीगदेसे डादा ग्यामरी
तोःबा जम्मान स्हे ढिकना लखम्ला।
^७चु पाल्से चा एनीगदेदेन छिन्नड जे
हुप तबारी खबा आहिन, प्रभुला सेम
तजी भिसम तिगै धिनधोना एनीगदेदेन
छ्यामनोन चिम्याङ्गला भिसी डाइ
आश लबा मुला। ^८तर पेन्तिकोस
भिबा चाडधोना डा एफिसस शहररीन
चिला। ^९डादा बिरोध लबा म्हिगदे
ल्हानान मुसैनोन थेरी प्रभुला घेन गे
लबारी डाइ ज्यबा मौका याङ्बा
मुला।

^{१०}चुदे तिमोथी एनीगदे मुबा ग्लारी
खजी भिसम थेदा एनीगदेदेन छ्याम
ज्यना लसी चिपुङ्गो। तिग्दा भिसम
थेसेनोन डाइ हङ् लसीन प्रभुला गे
लबान मुला। ^{११}थेतबासेलमा थेदा
खलैसेन हेला थालउ। तर थे डा मुबा
ग्लारी खमा एनीगदेसे थेदा ज्यना
लसी पुइखउ। तिग्दा भिसम चुरी मुबा
विश्वासीगदेदेन डाइ थेदा भ्रान्सी
चिबा मुला।

^{१२}आले अपोल्लोसदा डाइ स्थान्दो
ज्योज्यो आलेगदेदेन छ्याम एनीगदे
मुबा ग्लारी निउ भिसी ल्हानान पाङ्बा
मुला। तर थेसे दान्दे एनीगदे मुबा
ग्लारी खबा सेम आलनी, तजी भिसम
थे लिच्छा एनीगदे मुबा ग्लारी खला।

चिठीला थुमरी पाङ्बा

१३ एनीगदे होशियार तसी चिउ।
ओच्छे विश्वासरी कोङ्सी चिउ।
थेहङ् लसी आलोङ्ना आँट थोसी
भ्रउ। १४ एनीगदेसे जुन जुन गे लला थे
जम्मान गे मायाग्याम लउ।

१५ अखैया भिबा अञ्चलला
जम्मान म्हिगदे न्हङरी जम्मान भन्दा
डाच्छा स्तिफनासदेन थेला म्हेमेगदेसे
विश्वास लबा हिन्ना भिबा ताम
एनीगदेदा थानोन मुला। थेनीगदेसे
परमेश्वरला म्हिगदेसे लबा गेरी
सेमहेन्सेन हो लबा मुला। ज्योज्यो
आले नाना आडागदे, डाला चु बिन्ती
मुला, १६ थेहङ्बा म्हिगदेदेन थेहङ्बा
गे लबा स्थान्दो म्हिगदेसे पाङ्मा
ङ्यान्गो। १७ स्तिफनास, फोर्टुनाटसदेन
अखाइकस खमा डा ल्हानान ताङ्जी।
तिगदा भिसम थेनीगदेसे एनीगदे
आरेबासे लमा डादा तोःबा जम्मान
स्हेगदे पिन्बा मुला। १८ थेनीगदेसे
एनीगदेदा हङ्गोन डादाएनोन आँट

पिन्बा मुला। थेतबासेलमा एनीगदेसे
थेहङ्बा म्हिगदेदा मान लउ।

१९ एशियारी[†] मुबा मण्डलीगदेसे
एनीगदेदा फ्याफुल्ला भिसी पाङ्बा
मुला। अकिलासदेन प्रिस्का[†] ओच्छे
थेनीगदेला दिमरी मुबा मण्डलीसेनोन
एनीगदेदा फ्याफुल्ला भिसी पाङ्बा
मुला। २० चुरी मुबा जम्मान ज्योज्यो
आले नाना आडागदेसे एनीगदेदा
फ्याफुल्ला भिसी पाङ्बा मुला।
एनीगदेसेनोन हाङ हाङ न्हङरी
गिकसेम गिकदा सेमहेन्सेन माया
लसी फ्याफुल्गो।

२१ डा पावल हाङलान यासे
फ्याफुल्ला भिसी भिबा मुला।[†]

२२ जुन म्हिसे प्रभुदा माया आल थेसे
परमेश्वरग्याम सजाय याङ्गै। प्रभु,
हाङ फेप्खउ!

२३ प्रभु येशूला दयामाया एनीगदेदेन
छ्याम तगै।

२४ ओच्छे ख्रीष्ट येशूदेन छ्याम
गिक तबा एनीगदे जम्मादान डाइ
माया लला, आमेन।

१६:१६ चु चिठी भिबा धुङरी चा चु ग्लादा एशिया भिमुबा, तर दान्दे चा चु ग्ला टर्की भिबा
यहुल्सा हिन्ना।

१६:१६ ग्रीक बाइबलरी चु पददेन १ कोरिन्थी १६:१६ पदरी जे प्रिस्का भिसी भिबा मुला।
अर्गु जम्मान ग्लारी प्रिस्किला भिसी भिबा मुला। प्रिस्का भिबादेन प्रिस्किला भिबा म्हि
गिकनोन हिन्ना।

१६:२१ पावलसे स्थान्दो म्हि गिकदा पाङ्सी भिपुङ्जी, तर चु चिठीरी मुबा जम्मान ताम
पावलसे पाङ्बा अन्धार भिबा हिन्ना भिसी जम्मासेन था याङ्गै भिसी चु पदला ताम चा
पावल हाङसेन भिबा मुबा।